

KINANŌ TAKADA KAAKU

Sulemanu kíblenaa 1:1-2:46

Kína Sulemanu yā 3:1-11:43

Yudanŋ kŭ Isarailanŋ kŋkpaatenaa 12:1-16:34

Iliasu yā 17:1-22:54

Adonia a zīda kana kína ũ

¹ Kŭ kína Dauda zī kŭ yúkuyuku, bee tó ò bizanŋ kùala, ĩa dì gí àgŋ a demε.

² Akŭ a ibanŋ pìnε: Ó dikiri kí, ò tó ò nŋkpare wetenne, àgŋ zī kenne àgŋ n gwa, àgŋ wute n sare de ĩa sún n de dorŋ.

³ Akŭ ò gèε ò kpáte kè nŋkpare manai Isarailanŋ bùsun pínki, akŭ ò bò Sunemu nŋgbē Abisagaa, ò a sè ò sù kāao kinanε.

⁴ Nŋkpare pì bi nŋ manamε. Àdigŋ kína gwa àgŋ zī kenε, ama kína dí a dŋ nŋgbē ũro.

⁵ Dauda nanŋ Agi né Adonia a zīda dìte kŭ a ka, akŭ à pì ákāa mé áni kí ble sà. Akŭ à sŋgonŋ sè kŭ sŋdenŋ kŭ gŋgbē gbēnŋn bupla akuri kŭ onigŋ bàà lé ògŋ ténε arenŋ.

⁶ A de dí kpākēi ziki à pi, à kè dera nten ke lεero. Àpi sŋ bi kefenna manamε. Abusalomu mé à yŋ mì à kpāa.

⁷ Akŭ à lédokŋnŋ kè kŭ Zeruya né Yoabuo kŭ sa'ori Abiatao, akŭ ò zè kāao.

⁸ Ama sa'ori Zadoki kŭ Yoyada né Benayao kŭ annabi Natāo kŭ Simeio kŭ Dauda gbēnnanŋ kŭ a dogarinŋ dí ze kāaoro.

⁹ Adonia sa ò kŭ sānŋ kŭ zùnŋ kŭ zùnε mèkpananŋ Gbèmlē kŭ à kú Enlogeli sareε. À a

dakūna kīnanenŋ sīsī n pīnki kū Yuda kū ò de kīna ìba ũnŋ n pīnki.

¹⁰ Adi annabi Natā sīsīro ke Benaya ke Dauda dogarinŋ ke a zīda dakūna Sulemanu.

¹¹ Akū Natā gèè à Sulemanu da Baseba là à pì: Ndi ma kū Agi né Adonia kí blè ó dikiri kīna Dauda dōnaa sariroo?

¹² Tò, n tó mà lé damma sà lákū ĩni ke nà, n n zīda mì sí kū n né Sulemanu póo.

¹³ N fute n gé kīna Dauda le n pinε, kū à la dānne yā à pì n né Sulemanu mé ani kí ble a gēne ũ à vute a gbàn sō bi? À kè dera Adonia gḥ kīna ũu?

¹⁴ Gɔɔ kū n kpé nten yā onε, mani gē mà yā'i kara se.

¹⁵ Akū Baseba gèè à kīna lè a kpéne gūn, gu kū Sunemu nɔgbē Abisaga teni a gwan. Kīna sō à zī kū.

¹⁶ Baseba kùte à mì pètene, akū kīna a là à pì: Bón n yeii?

¹⁷ À wèa à pì: Baa, mɔkōn mé n la dà makū n zòbleriine kū Dikiri n Luda tóo, n pì ma né Sulemanu mé ani kí ble n gēne ũ à vute n gbàn.

¹⁸ Tera sō ma dikiri kí, Adonia mé à kè kīna ũ, akūsō n a yā dōro.

¹⁹ À sa ò kū zùnŋ kū zùne mèkpananŋ kū sānŋ dasidasi, à n nēnŋ sīsī n pīnki kū sa'ori Abiatao kū zīkari don'arede Yoabuo, ama adi n zòbleri Sulemanu sīsīro.

²⁰ Ma dikiri kí, mɔkōmme Isarailanŋ sā dōnyī n pīnki ò ma tó dí mé ani ke kīna ũ n gēne ũ.

²¹ Ma dikiri kí, tó n ka n dizinŋla, makū kū ma né Sulemanuo, onigō ó gwa taaridenŋ ũme.

22 Kū à kpé àten yā o kū kínao, akū annabi Natā sù.

23 Ò ò kínane kū annabi Natā kú la. Akū Natā gè à kùte kínane à wùte a nèsese kutena

24 à pì: Ma dikiri kí, mɔkɔn mé n pì Adonia ke kína ũ à vute kín n gēne ũ yá?

25 Zaakū à gèe à sa ò gbāra kū zùnɔ kū zùne mɛkpananɔ kū sãnɔ dasidasi. À n nénɔ sisi n pínki kū n zìkari don'aredeo kū sa'ori Abiatao. Òten pò ble kāao, òten í mi tera, òten pì: Luda kína Adonia dɔ kū aafiaao!

26 Ama adi makū n zòbleri sísiro ke sa'ori Zadɔki ke Yoyada né Benaya ke n zòbleri Sulemanu.

27 Ma dikiri kí, ase mɔkɔn mé n kè le, akū n gi gbè kū ani vute kín n gēne ũ oi ókɔnɔ n zòblerinɔne yá?

Sulemanu kana kína ũ

28 Akū kína Dauda pì: À Baseba sísimene. Kū Baseba sù à gè, à sù à zè kína are.

29 Akū kína la dànè à pì: Kū Dikiri kunnaao! Àkū mé à ma bo wari sɛnda pínki gūn.

30 Ladana kū ma kènne kū Dikiri Isarailanɔ Luda tóo, ma pì n né Sulemanu mé ani kí ble ma gbèn à vute kín ma gēne ũ, mani papa gbāra sãnsãmmɛ.

31 Akū Baseba kùte à m̀i pète zíte kínane à pì: Ma dikiri kína Dauda, Luda n dɔ kū aafiaao gɔɔ sɛnda pínki!

32 Akū kína Dauda pì: À sa'ori Zadɔki sísimene kū annabi Natāo kū Yoyada né Benayao. Kū ò sù kína kīnaa,

33 à pì: À ma ìbanɔ kakara á ma né Sulemanu sé à a di ma baragbāsā, á gé kāao Giō.

³⁴ Gwen sa'ori Zadoki kũ annabi Natão ni nĩsi kũa ò a ká Isarailano kina ũ, á kuru pé à wiki lé à pi: Luda kina Sulemanu dõ kũ aafiaao!

³⁵ Abire gbera á su kãao, a vute gbàn àgõ kí ble ma gẽne ũ. Àkũme ma dìte Isarailano kũ Yudano don'arede ũ.

³⁶ Akũ Yoyada né Benaya pì kìnane: À ke le! Dikiri n Luda n légbɛ sí ma dikiri kí!

³⁷ Lákũ Dikiri kú kũnwo nà ma dikiri kí, àgõ kú kũ Sulemanuo le, à a kíkɛ sé lei de n póla se.

³⁸ Akũ sa'ori Zadoki kũ annabi Natão kũ Yoyada né Benayao kũ dogarino gèe ò Sulemanu dì kina Dauda baragbãšã, ò gèe zene Giõ.

³⁹ Akũ sa'ori Zadoki nĩsi tũruu sè Dikiri kpén, à nĩsi pìi kũ Sulemanua. Akũ ò kuru pè, gbẽ sĩnda pínki wiki lè ò pì: Luda kina Sulemanu dõ kũ aafiaao!

⁴⁰ Akũ gbẽ sĩnda pínki bò ò tèi, òten su òten úra pé, òten ponna ke manamana ari zĩte yìgã kĩni kũ òten ke pì yã.

⁴¹ Kũ Adonia kũ gbẽ kũ à nĩ sisino pò blè ò làka, òten su fute, akũ ò kĩnii pìi mà. Kũ Yoabu kuru ũ pìi mà, akũ à pì: Bó zuka mé à dõ wète gũn lɛɛ?

⁴² Adi yã pìi ò à làkaro, akũ sa'ori Abiata né Yonatã kà gõno. Akũ Adonia pì: Nĩ gẽ. Bèèredeme n ũ, maten sí baaru nnan n suo.

⁴³ Akũ Yonatã pì Adoniane: Lenlo! Ó dikiri kina Dauda Sulemanu kà kìn.

⁴⁴ À sa'ori Zadoki kũ annabi Natão kũ Yoyada né Benayao kũ a dogarino gbàre ò gé kãao, akũ ò gèe ò a dì kina baragbãšã.

⁴⁵ Akũ sa'ori Zadoki kũ annabi Natão nĩsi kũa ò a kà kina ũ zaa Giõ. Kũ ò bò gwe, ò sù kũ

pɔnnakenaao, akū wēte loko. Kīni kū a màn gwe.

⁴⁶ Bee derame Sulemanu vùte kín kò.

⁴⁷ Akū ó dikiri kína Dauda ìbanɔ sù ò fɔ kpàa se, ò pì Luda tó Sulemanu tó bo de a pòla! Luda a kíkε gba gbāna de a pòla! Akū Dauda mii nàte à donyĩ kè Dikirine a gádoa

⁴⁸ à pì: Ò Dikiri Isarailanɔ Luda sáabu kpá, kū à tò ma wé sù ma gēnele kana kína ũ gbāra.

⁴⁹ Kū gbē kū Adonia n̄ sisinɔn mà le, akū n̄ laakarīi fùte, baadi a zé kù.

⁵⁰ Kū Adonia ten vīna ke Sulemanune yāi, akū à fùte à gèe à nà Dikiri gbagbakii à a bēne kù.

⁵¹ Akū ò pì Sulemanune: Adonia ten vīna kenneme, à gèe à nà Dikiri gbagbakii à a bēne kūna, àten pì n̄ la da akāa n zòbleriine gbāra, kū ĩni a dero.

⁵² Akū Sulemanu pì: Tó à a zīda kūna dō gbē mana ũ, bee a mikā wén do ni léte zītero. Tó ò sù ò yā vāni ke lèa sō, à gāme.

⁵³ Akū kína Sulemanu gbēnɔ zì, ò Adonia gò Dikiri gbagbakia. Kū Adonia pìi sù à kùtene, akū Sulemanu pìne: N̄ tá n bea.

2

Dauda léditena Sulemanune

¹ Kū Dauda gagɔɔ kà kāni, à lé dīte a né Sulemanune à pì:

² Maten gé andunia gbē sīnda pínki gékia. N̄ ze gbāna, n̄ n zīda mɔ kū nэгɔgbēmε n ũ!

³ N̄gɔ Dikiri n Luda yānɔ kūna, n̄gɔ té a zéi, n̄gɔ a ɔɔɔki gwa, n̄gɔ a yāditenanɔ kūna kū a dokayānɔ kū a yá'onnenanɔ, lākū à kú Musa doka takadan nà, yā

kū nten ke sīnda pínki nigō bo mana, n tá pínki nigō nna.

⁴ Len Dikiri ni yā kū à òmēne papa le à pì, tó ma nēno í zīda kūna dō akūsō ò té ma zéi kū nèse mēn doo kū í poyeinaao pínki, ma burino nigō vutena Isarailano kín goro sīnda pínki.

⁵ N yā kū Zeruya né Yoabu kēmēne dō, lākū à Isaraila zīkari don'arede gbēnon plano dēde nà, Nere né Abana kū Yeta né Amasao. À gbē pino dēde, adi ke sō zī goronlo. N aru gō a musu, à kù a asaaa kū a kyatenō.

⁶ N yā kēne n ōndōna lén. Nsun tó a mikā pura kū gbasa à ta miran yīdaro.

⁷ N gbēke ke Giliada gbē Bazilai négōgbēnonē. N í dite gbē kū ánigō pó ble leelenō té, zaakū mókōno mé ò zē kūmao goro kū maten bàa sí n vīni Abusalomunē.

⁸ Biliaminu buri Gera né Simeí, Bahurimu gbē kú kūnwo do. À ma ka pāsīpāsī goro kū maten gé Manaimu. Kū à sù à ma le Yodai, ma la dāne ma pì kū Dikirio mani a dero.

⁹ Bee kū abireo nsun a tó gwe wētāmmanaa sariro. N ōndō, í dō deran ĩni kēne nà à ga kpām à gē miran.

¹⁰ Akū Dauda gà. Yurusalemu fārāndi kū ò a vīn òdi pì Dauda wēte.

¹¹ À kē Isarailano kína ũ ari wē bupla, Eblonu wē suppla, Yurusalemu wē baraakuri awēē'aakō.

¹² Sulemanu vùte a de gbàn akūsō à kpata zīni petena.

Adonia ganaa

13 Agi né Adonia gèè à Sulemanu da Baseba lè, akū Baseba a là à pì: Aafian n su yá? À wèa à pì: Aafiamè!

14 Adonia èra à pì: Má yā vī mà onne. Baseba pì: Ñ o!

15 Akū Adonia pì: Ñ dǝ kū kpata de ma pó ũ yā. Isarailano wé kúma ní pínki mà ke ní kína ũ, akū yā lite, ma dakūna mé à kpataa blè, zaakū Dikiri mé à a kà.

16 Tera sà yā mèn don maten wé kemma, ñsun gí kemeneiro. Baseba pì: Ñ o!

17 Akū à pì: Ñ wé kemene kína Sulemanua à Sunemu noḡbē Abisaga kpáma no ũ, zaakū ani gínne kãaoro.

18 Baseba pìne: Tò, mani onenne.

19 Kū Baseba gèè à kína Sulemanu lè Adonia yā pìi musu, akū kína pìi fùte à gèè à dàale à kùtene, akū à èra à sù à vùte a kiblegan. Akū ò sù Basebane kū kiblegba pãndeo, akū à vùte kína oplai.

20 Baseba pì: Póken má yei mà wé kemma, ñsun ma tēro. Akū kína pì: Ñ wé ke Naa, mani n tēro.

21 Akū Baseba pì: Ñ tó ò Sunemu noḡbē Abisaga kpá n vīni Adoniaa à a sé no ũ.

22 Akū kína Sulemanu a da là à pì: Bóyáin nten Sunemu noḡbē Abisaga wé ke Adonianee? Ñ kpata wé ke ne gǝno sàee! Zaakū ma vīnimè. Nten kpata wé ke ne kū sa'ori Abiatao kū Zeruya né Yoabuome.

23 Akū kína Sulemanu la dà à pì: Ma sì kū Dikirio, tó Adonia dí kura a wëndiii yā kū à wé kè dí yairo, Luda yā kemene pāsīpāsī.

24 Zaakū Dikiri ma ka kín, à ma dite ma de Dauda gēne ũ, à ma buri gbà gbãna lákū à a lé sè nà, ma sì

kū Dikirio Adonia ni ga gbārame.

²⁵ Akū kína Sulemanu Yoyada né Benaya dà, à gèè à Adonia lè à dè.

Sulemanu pɛna Abiataa kū Yoabu ganaao

²⁶ Kína pì sa'ori Abiatane: Ñ era n tá n gun Anato. À kù n game, ama mani n de teraro, zaakū mɔkɔn mé n Dikiri Luda àkpatii sè n doo ma de Daudane are, akūsɔ n ze kãao a wari sīnda pínki gūn.

²⁷ Len Sulemanu pè Abiataa le, à a bò Dikiri gbagbana zīn, de yā kū Dikiri ò Eli bedeno musu zaa Silo le à papa yāi.

²⁸ Kū Yoabu a baaruu mà, akū à bàa sɔ à gèè Dikiri bizakuta kīnaa, à nà Dikiri gbagbakii à a bēnenɔ kù. Yoabu zè kū Adoniaome yā, ama adi ze kū Abusalomuoro.

²⁹ Ò ò kína Sulemanune kū Yoabu bàa lè à gèè Dikiri bizakuta kīnaa, à kú sa'oki pìi sare, akū Sulemanu pì Yoyada né Benayane à gé à láka kãao gwe.

³⁰ Kū Benaya kà Dikiri bizakuta kīnaa, à pìne: Kína pì n bo gwe! Akū Yoabu pì: Oi! Gu dín mani gan. Akū Benaya gbēnɔ zī kīnaa à pì: Lákū Yoabu yā wema nàndí.

³¹ Akū kína pìne: Ñ kenε lákū à ò nà. Ñ a de, n a vī, de a gbēdena pā yā sún wí makū kū ma de bedeno musuro.

³² Dikiri ni tó a gbēdena yā wí a musu, zaakū à lète taarisaride gbēnɔn pla kū n mana dealanɔa. À Nεre né Abana, Isaraila zīkarinɔ don'arede kū Yeta né Amasa, Yuda zīkarinɔ don'aredeoo dède ma de lé sari.

33 Ñ dena yā nigõ wí Yoabu kũ a burinõ musu gɔɔ sīnda pínki, ama Dikiri nigõ Dauda kũ a burinõ kũ a onnwo kũ a kpataao gba aafia gɔɔ sīnda pínki.

34 Akũ Yoyada né Benaya gèε à Yoabu lè à dè, akũ ò a vī a bea zaa gbárannan.

35 Akũ kína Yoyada né Benaya dìte zìkarinõ don'arède ũ Yoabu gēne ũ, sa'ori Zadoki sõ, Abiata gēne ũ.

Simeï ganaa

36 Kína gbēnõ zī ò Simeï sisi, akũ à pìne: Ñ be bo Yurusalemu la ñgõ kún. Ñsun bo bera la ñ gé gukearo.

37 Ñgõ dõ sãnsãn gɔɔ kũ n bikù Kidironua, n gan gwe. Ama n n zīda dè.

38 Akũ Simeï pì kìnane: Yā maname ma dikiri kí. Makũ n zòbleri mani ke lákũ n ò nà. Akũ à kú Yurusalemu le ari à gù kè.

39 Wè aakõ gbera Simeï zò gbēnõn planõ bàà sì ò tà Maaka né Akisi, Gata kína kīnaa, akũ ò pì Simeïne: N zònõn kú Gata.

40 Akũ Simeï fùte à gàarii yī a zaakine, à gèε Akisi kīnaa Gata a zò pìnõ wetε. Kũ à n lé, akũ à n sète Gata à sù kũnwo.

41 Akũ ò ò Sulemanune, Simeï bò Yurusalemu à gèε Gata à èra à sù.

42 Akũ kína gbēnõ zī ò Simeï sisiare, akũ à pìne: Ma tò n la dà n pì n sì kũ Dikirio, akũ ma lé damma ma pì, zī kũ n bo la n ge gukea, ñgõ dõ kũ n game. Akũ n pìmenε, yā maname, n mà.

43 Bóyain n bo ladana kũ n sì kũ Dikiri tóo kpe kũ yā kũ ma dànnεoo?

44 Akū kína èra à pìne dɔ: Yā vāni kū n kè ma de Daudane dɔngu pínki. Dikiri mé ani tó a vāni pì wí n musu sà,

45 ama ani arubarika damagu à tó Dauda kpata zīni gō petena ari gɔɔ sīnda pínki.

46 Kína Yoyada né Benaya dà, akū à gèe à Simeì lè à dè. Len Sulemanu kpata zīni pète le.

3

Sulemanu ɔndɔ wékɛnaa

1 Sulemanu lédokɔnɔ kè kū Misila kína Firi'aunao, à a nénɔgbē sè nɔ ũ à sù káao Dauda wētɛn ari àgō a be kū Dikiri ɔnnwo kū Yurusalemu bīnio bo à láka.

2 Gɔɔ birea odi kpé bo Dikirine kòro, akū òdigō sa o kpi musu tãnagbagbakina.

3 Sulemanu ye Dikirii, à a de Dauda yãditenanɔ kūna, ama àdi sa o gbagbaki pìnɔa, akū àdigō turearetiti kpata gwe.

4 Akū à gèe sa o zaa Gibiɔ, zaakū gbagbaki pì mé à de a kparanɔla. À sa'opɔ kū òdi ká tén à té kū ò gwe mèn wàa sɔɔro.

5 Gwen Dikiri bò à sùà nana gūn gwāani à pì: N pò kū ní yei wé kema.

6 Akū Sulemanu pì: N gbēke kè n zòbleri ma de Daudane manamana, kū à denne gbē mana náanide nèsɛpurade ũ yāi. N gbēke zókɔ kènɛ, n tò makū a né tɛn kí ble a gēne ũ gbāra dí.

7 Tera sà Dikiri ma Luda, n makū n zòblerii kà kína ũ ma de Dauda gēne ũ. Né fítin ma ũ, má yāke gbá dōro.

8 Makū n zòblerii, má kú n gbē kū n sènɔ té. Ó dasi, oni fɔ ò ní naro ò ní lé dōro.

9 Ñ makū n zòbleri gba òndò, de màgò yā gògò n gbēnɔne a zéa, màgò a mana dōkōne kú a vānio. Tó lenlo, deran mani ke nà mà yā gògò n gbē dasi pìnɔne?

10 Yā kú Sulemanu wé kèe pìi kè Dikirine,

11 akū à pìne: Zaakū yā kú n wé kèn gwe, nídi wèndi gbàna wé kero ke aruzeke ke n ibereɔ ga, séde yāgògòna a zéa dōnan n wé kè,

12 mani ke lākū n wé kè nà, mani n gba òndò kú wézèo. Gbē ke kun n ā ke n gbera kú anigò òndò lán n bàro.

13 Mani pò kú nídi wé kero kpámma do. Mani n gba aruzeke kú gakurio pínki ari n wèndi lén. Kína ke ni ká n ūro.

14 Tó í témai, akūsò í ma yā'onnenano kú ma yāditenano kúna lākū n de Dauda kúna nà, mani n wèndi donne kú mòkakōanaao.

15 Akū Sulemanu vù, à é kú nanan a ò. Akū à tà Yurusalemu, à gèe à zè Dikiri bàka kunna kú Isarailano àkpati are, à sa'opo kú òdi ká tén à té kúno kú kennakūkòo sa'opono ò gwe, akū à ponna pòble kè a ìbanone.

Sulemanu yāgògòna karuanone

16 Zíkea karua gbēnon pla kenɔ sù Sulemanu kīnaa, ò zè a are.

17 Ñ gbē do pì: Ñ gaafara kemene kína. Makū kú nɔgbē dío ó kú kpé dokōnɔme. Akū ma né ì ókōnɔme ó pla kpé pìi gūn.

18 A goro aakòde zī nɔgbē pì né ì se. Ókōnɔme ó pla kpé pìi gūn, gbēke kú kúoo gwero.

19 Kú nɔgbē pìi wùte a négògbē pìia gwāani, akū à gà.

20 Akū à fùte gwāani lizāndo, à ma nэгōgbē sè ma sare goro kū makū n zòbleri maten i o, à wùte a sare, akū à a né gèe pìi sè à wùtemene ma sare.

21 Kū ma vu kɔnkɔ mà yō kpá ma néa, akū ma è gè ũ. Kū ma gwà tíii, akū ma è ma nénlo.

22 Akū nɔgbē pì gbē do pì: Ekeme! Ma né mé à bēne, n pó mé à gà. Akū nɔgbē káaku pì: Ekeme! N né mé à gà, ma pó mé à bēne. Akū òten lékpakōana ke kína are.

23 Akū kína pì: Gbē díkína ten pi a né mé à bēne, n pó mé à gà, akūsō gbē dire ten pi, ekeme, n né mé à gà, a pó mé à bēne.

24 Akū kína pì: À mɔmene kū fēnedao. Akū ò sùone.

25 Akū kína pì: À né kū à bēne zōkōre pla, à kpado kpá gbē doa, à kpado kpá gbē doa.

26 Nɔgbē kū a né bēne sō, né pii kène wēnda, akū à pì kínane: Kí, ò né kū à bēne pì kpáa, òsun a dero. Akū a gbē do pì: Ò a zōkōre pla, ó pínki ò kurai.

27 Akū kína yā mù zò à pì: À né kū à bēne pì kpá nɔgbē káakua. Àsun a dero. A dan gwe.

28 Kū Isarailanɔ yákpate kū kína kèe pìi mà, ò vīna kène, zaakū ò è Luda a gbà òndō à yā gōgō a zéa.

4

Sulemanu ibanɔ

1 Kína Sulemanume Isaraila buri sīnda pínki kína ũ.

2 A bùsu don'aredenɔ tón dí: Zadoki né Azariame sa'oriki ũ.

3 Sisa nénɔ Eliɔrefi kū Ahiaome a takadakērinɔ ũ. Ailudi né Yosafatame yāzībaarukēri ũ.

4 Yoyada né Benayame a zikari don'arede ũ. Zado̅ki kũ Abiataoome sa'orino̅ ũ.

5 Natã né Azariame a gu don'aredeno̅ gbẽ zõkõ ũ. Sa'ori Zabudu, Natã néme a kpàasi ũ.

6 Aisame a be azia ũ. Abada né Adoniramume zòzĩ gbẽ zõkõ ũ.

7 Kína Sulemanu Isarailano̅ bùsu gbẽ zõkõno̅ dìtedite guno̅a gbẽno̅n kuri aweεpla. Wè kũ wèo ñ baadi dì su kína kũ a ondenone̅ kũ pòbleo ñ baadi kũ a mo̅o.

8 Ñ tón dí: Uru né mé à Eflaimu burino̅ gu sísìde vĩ.

9 Deka né mé à Makaza kũ Salabimuo kũ Besemesio kũ Elbni Betanao vĩ.

10 Esedi né mé à Arubo kũ Sokoo vĩ kũ Efa gu pínki do̅.

11 Abinadabu né mé à Doru gusísìde vĩ. Sulemanu nénogbẽ Tafame a no̅ ũ.

12 Ailudi né Baana mé à Tanaki vĩ kũ Megidoo kũ Betesã gu kũ à kãni kũ Zaretão Yezerili gēi kpa pínki zaa Betesã ari Abeli Meola ari Yokemeamu dire kpa.

13 Geba né mé à Ramo̅ Giliada vĩ kũ Manase né Yairi lakutu kũ ò kú Giliada gūnnõ kũ Agobu gu kũ à kú Basão kũ a wéra bñide mèn baaakõno̅. Ò ñ zé gùrukpanano̅ kè kũ mōgotēome̅.

14 Ido né Ainadabu mé à Manaimu gu vĩ.

15 Aimaza mé à Nafatali gu vĩ. Àkũ mé à Sulemanu nénogbẽ Basema sè no̅ ũ.

16 Usai né Baana mé à Asa gu vĩ kũ Alotio.

17 Parua né Yosafata mé à Isaka gu vĩ.

18 Ela né Simeĩ mé à Biliaminu gu vĩ.

19 Uri né Geba mé à Giliada gu vĩ. Amorino̅ kína Siõ kũ Basã kína Oguo mé ò kú gwe yã. Gebame gu pì don'arede ũ ado̅.

20 Yudanɔ kũ Isarailanɔn dasi lán ísirale b̀usu'atẽ bà. Òdigõ pó ble ò í mi ò pɔnna ke.

Sulemanu nnamana kũ a ɔndõ

21 Zaa Yuflati ari Filisitininɔ b̀usun kũ Misila b̀usu léo, Sulemanu mé à kí blè b̀usuu p̀nɔa p̀inki. B̀usuu p̀inɔ gbẽnɔ òdigõ táfe bone ari a wẽndi lén.

22 Sulemanu ɔn gɔɔ do p̀óblen dí: Flawa asasa bupla akuri, wísiti asasa basɔɔro.

23 Zù mèkpana kũ ò gwà be mèn kuri, kpàsa zù baro, sã basɔɔro kũ gãnɔ kũ zõnɔ kũ b̀uganɔ kũ ko mananɔ dɔ.

24 Zaakũ à kí blè b̀usu kũ à kú Yuflati ifálete kpanɔa p̀inki sena zaa Tifisa ari Gaza, akũsõ yáketé kú gukearo.

25 Sulemanu gɔɔa Yudanɔ kũ Isaraila kũ ò kú zaa Dã ari Besebanɔ katena n̄ b̀usun n̄ laakarriame, baadi kũ a geepi línɔ kũ a kakapura línɔ.

26 Sulemanu sõ kũ òdi gó gátenɔ kósɔ dúbu siikõme. A sõ kũ òdi òdimmanɔ sõ, dúbu kuri awεεpla.

27 Gu gbẽ zõkõ p̀inɔ sõ, n̄ baadi òdigõ sunε kũ p̀óbleo a mɔa kína Sulemanu kũ gbẽ kũ òdi su p̀ó ble kãaonɔ p̀ó ũ. Póke di kãam̄maro.

28 Òdigõ su sõ p̀inɔne kũ éseo kũ sèeo dɔ gu kũ ò kún, lákũ ò òdite n̄ baadine nà.

29 Luda Sulemanu gbà ɔndõ kũ wézẽo manamana. Oni f̄ ò a dõna lé dõro, lákũ oni f̄ ò ísirale b̀usu'atẽ lé dõro nà.

30 Sulemanu ɔndõ de ifábokikpadenɔ kũ Misi-lanɔ p̀óla n̄ p̀inki.

31 À ɔndõ de gbẽ s̄inda p̀inkila. À de Ezera buri Etani p̀óla kũ Maɔli n̄nɔ Emanu kũ Kalakolio kũ Daadao. À tó b̀ò b̀usu kũ ò likainɔ gũn p̀inki.

³² À yáasi zù dúbu aak̄s̄ ak̄s̄s̄ lè k̄ū à dàn̄o kà dúbu do k̄ū mèn̄ sooro.

³³ À lín̄o k̄ū lán̄o yā bok̄otenaa kè, naana zaa sida lí k̄ū à kú Lebana bùsun ari à gèe pé s̄ès̄v̄lā k̄ū àdi bute b̄ñian̄o. À n̄òb̄ōn̄o yā dàñ̄e do k̄ū bān̄o k̄ū p̄o k̄ū òdi t̄aa o k̄ū k̄uaon̄o k̄ū kp̄òn̄o.

³⁴ Kína k̄ū ò kú andunia ḡūnn̄o a ònd̄o baaruu mà ñ pínki. Bùsu k̄ū bùsuuo pínki ñ gb̄ēn̄o z̄ì ò gé a ònd̄oyā ma.

5

Dikiri òn katena soru

¹ Kū Taya kína Hiramū mà k̄ū ò Sulemanu kà kína ũ a de ḡēn̄e ũ, à a ìba ken̄o z̄ì, zaakū Dauda gb̄ēn̄name yā.

² Akū Sulemanu légbāzā kè Hiramun̄e à p̄i:

³ Ñ d̄s̄ k̄ū ma de Dauda dí le à ònn̄ k̄àte Dikiri a Ludan̄ero, k̄ū buri k̄ū ò likain̄o ten z̄ì ká k̄āo yāi, ari Dikiri ḡèe à ñ k̄éne tintin ũ.

⁴ Tera sà Dikiri ma Luda tò ma ñampaki lè. Iber̄e ke kú gukearo, ásarū ke kunlo.

⁵ Abire yāin má ye mà kpé bo Dikiri ma Ludan̄e, lākū Dikiri ò ma de Daudan̄e nà, à p̄i a né k̄ū áni ká kpatan a ḡēn̄e ũ mé ani kpé boare.

⁶ Ñ gb̄ēn̄o da ò Lebana sida lín̄o z̄s̄z̄m̄en̄e. Ma z̄īkerin̄o ni z̄ī p̄i ke k̄ū n z̄īkerin̄o lēle, mani n z̄īkeri p̄in̄o f̄ina bonn̄e lākū n ò nà pínki. Ñ d̄s̄ k̄ū ó gb̄ēke v̄i à l̄íz̄na d̄s̄ lán̄ ak̄ōn̄o Sid̄ōden̄o b̄aro.

⁷ Kū Hiramū Sulemanu yā p̄i mà, a p̄o kè nna manamana à p̄i: Ò Dikiri t̄ó kpá gbāra, zaakū à Dauda gbà né ònd̄ode, àten do a gb̄ē dasin̄one are.

8 Akū Hiramū gbēno zī Sulemanua à pì: Ma légbāzā kū n kèmenε mà. Mani ke lākū n̄ yei nà sida líno kū pini líno yā musu.

9 Ma zīkerino ni lí pino sé zaa Lebana kpino musu, oni kipao ísira léa, mani yīyī mà gbēno zionne ísira musu. Gu kū n òmenen, gwen mani tó ò kátennne, gbasà n̄ táo. Mókōn sō, yā kū má ye n̄ kēmenen dí: N̄ póble kpá ma ondenoa.

10 Len Hiramū òigō sida líno kū pini líno kpá Sulemanua le lākū à yei nà.

11 Sulemanu sō àdigō póblewε kpáa wè kū wèeo tōn wàa pla kū nísio líta dúbu wàa pla.

12 Dikiri Sulemanu gbà ondo lākū à a lé sène nà. Hiramū kū Sulemanuo nna kū kōo, akū ò lédokōno vī.

13 Kína Sulemanu gbēno sèse Isaraila burino té pínki à n̄ dá zī pì gūn gbēnon dúbu baraakuri.

14 Àdigō n̄ zī Lebana bùsun mo kū mo gbēnon dúbu kuri. Gbē pino dì ke Lebana mo do, akū òdi su ò ke be mo plapla. Adoniramume zòzī pì gbē zōkō ũ.

15 Sulemanu gbè'arinō vī gukpiden gbēnon dúbu basiikō, a sèserino sō gbēnon dúbu baaakō akuri.

16 Gbē pino baasi, Sulemanu gbēno ditedite gbēnon dúbu aakō kū wàa aakōo, ògō wé pá zī piia.

17 Kína yā dīte, akū ò gbè gbèntē manano yōyō ò à, ò sète ò sùo kpé pì ēpetegbeno ũ.

18 Len Sulemanu zīkerino kū Hiramū zīkerino kū Gebalidenō lí zōzō le ò kèke, ò gbèe kèke kpé pì bobo ũ.

6

Dikiri on katēnaa

¹ Isarailanŋ bona Misila wè wàa pla kŭ basiikŋoo gbera, Sulemanu kíblena wè siikŋden, a mŋ plade kŭ òdi pi Zivi gŭn, akŭ à nà Dikiri ŋn katenaana.

² Kpé kŭ à bò Dikirinεε pìi gbàna kà gàsákuru baaakŋ, a yàasa baro, a lei baraakuri.

³ Kpé pìi èda vī a are, a gbàna lεεε kŭ kpé pìio gàsákuru baro, a yàasa sŋ gàsákuru kuri.

⁴ À a wondonŋ bòbo, a lénŋn de yàasa, a gŭn kpa kpakoto.

⁵ À kpénenŋ bòbo à lika kpé pìii kŭ a Ludakukio kpa plapla kŭ a kpeo.

⁶ À didikŋana aakŋkŋ, kpéne kŭ ò kú zītenŋ yàasaa kà gàsákuru sŋsŋoro, a kŭ ò kú guraguranŋ sud-dodo, a kŭ ò kú musunŋ supplapla. Dikiri kpé gbè kŭ ò kú musunŋ yàasa kŭa zīte pŋi, de ò e ò kpéne pìi líkŋkŭnŋ didia kpé pìi gbèfŋnaa sari yāi.

⁷ Kŭ òten kpé pìi bo, ò bò kŭ gbè kŭ ò à zaa a yŋkiaomε. Odi ére ke gā ke zīkebo ke kīni ma kpé pìi bokiaro.

⁸ Kpéne kŭ ò kú zītenŋ pínki gēki kú a gènŋmidŋki krame. Didiki gèε kpéne kŭ ò kú guraguranŋ kŭ kpéne kŭ ò di a musunŋ kīnaa.

⁹ Kŭ à kpé pìi bò à làka, à dŋ kŭ zà línŋ kŭ sida lí lèketenŋ.

¹⁰ À kpéne pìnŋ bò kpé pìi gbàna lémmε. A pínki lei gàsákuru sŋsŋoromε, akūsŋ ò ní pépe kpé pìia kŭ sida lío.

¹¹ Akŭ Dikiri yā ò Sulemanunε à pìi:

¹² Kpé kŭ nten bo díkīna yā musu, tó nten ma ŋdŋki gwa, tó n ma yādannenanaŋ kè, tó ní yā kŭ ma

diteíneno kūna nten zĩ kea, mani lé kū ma sè n de Daudane papanne.

13 Manigō kú ma gbē Isarailano té, mani n tónlo.

14 Kū Sulemanu kpé pì bò à làka,

15 à sida lí lèketeno nàna a gb̃ia a gūn kpémkpem zaa zĩte ari a sakaa, akū à pini lí lèketeno kpàte a zĩte pínki.

16 À kpéne kè kpé pì gūn Ludakuki ũ, a gb̃ana kà gàsākuru baro, akū à sida lí lèketeno nàna a gb̃ia kpémkpem zaa zĩte ari a sakaa.

17 Kpé pì kpéda gb̃ana kà gàsākuru bupla.

18 Sida lí kū ò nàna kpé pì gūn, ò zĩ kèa lán tūru kū lávu pianaao bà. A pínki bi sida líme, a gbè ke dí bo gukea ò èro.

19 À kpé pì né kèke Dikiri bàka kunna kū Isarailano àkpati ditekì ũ.

20 Kpéne pì gb̃ana kà gàsākuru baro, a yàasa do baro, a lei sō baro. À wura atēne nàna kpéne pì gb̃ia pínki. À turaretitikpataki kū ò kè kū sida lío nàna kū wuraa do.

21 À wura atēne nàna kpéda gb̃ia do, akū à m̀kakōana kū ò pì kū wuraaono lòkoloko kpéne gb̃i kū à wuraa nànaa pìia kpélele kpa.

22 À wuraa nàna kpé pì gūngūn kpémkpem kū turaretitikpataki kū à kú kpéne pì sareo.

23 À kù lí à kerubuno ũ mèn pla, à dite kpéne gūn. Kerubuu pino lei kà gàsākuru kuri.

24 Ǹ dèmbereño gb̃ana kà gàsākuru sosooro. Zaa dèmbere do léa la ari a do léa dire a gb̃ana kà gàsākuru kuri.

25 Kerubu mèn pla pìnɔ bòkɔa, ò leeleme.

26 N̄ pla n̄ pínki lei kà gàsákuru kurikuri.

27 Akū à n̄ káte kpé pì né gūn. N̄ dèmbereɛnɔn poroporona, a do dèmbere gèe à pè gb̄ia dire, a do pò pè gb̄ia la, akū n̄ dèmbere kū ò ḡnɔ pèkɔa kpéne pì guragura.

28 À wuraa nàna kerubuu pìnɔa dɔ.

29 À ɔzĩ kè kpé pì gb̄inɔa kpéda kū a néo pínki, à kerubunɔ wānzān kè kū domina líɔ kū lávu piananɔ.

30 À wuraa kpàte kpé pì zĩte dɔ, kpéda kū a néo pínki.

31 À kpéne pì gb̄anɔ kū a lípetenɔ kè kū kù lío. A musu kè s̄nte.

32 À ɔzĩ kè kù lí gb̄a mèn pla pìnɔa, à kerubunɔ wānzān kè kū domina líɔ kū lávu piananɔ, akū à wuraa nànaa.

33 À kpéda gb̄a lí kè kusuru siikɔ kū kù lío dɔ.

34 À a gb̄anɔ kè kū pini lío né pla. Gb̄aa pìnɔ né pínki d̄i nakɔa guragura.

35 Akū à ɔzĩ kè gb̄aa pìnɔa, à kerubunɔ wānzān kè kū domina lío kū lávu pianaao, akū à wuraa nànaa.

36 À b̄ini b̄ò à lika a ɔnnyĩ. B̄ini pì gb̄e kū ò ànɔ v̄i didikɔana leu aakɔkɔ, akū sida lí kū ò z̄nɔ kpákpa a musu.

37 Ò Dikiri kpé pì ɛ pète Sulemanu kíblena wè siikɔden, a mɔ kū òdi pi Zivi gūmme,

38 akū ò a lakiti kè a wè kuri awɛedoden, a mɔ s̄raakode kū òdi pi Bulu gūn lákū à kpé zĩ d̄ite nà. A bona kū a k̄ekenaao kà wè suppla.

7

Sulemanu be bonaa

¹ Sulemanu a be bona zĩ kè pínki wè kuri awεε'aakõme.

² À kpé kũ òdi pi Lebana líkpe bò, a gbàna kà gàsákuru basõro, a yàasa kà gàsákuru bupla akuri, a lei sõ baraakuri. A sida línõ pètepete dõro siikõ, akũ à sida lí kũ ò àno dàdańla

³ mèn bupla awεεsõro, dõro kũ dõroõo gërogëro leu aakõ, akũ à sida línõ kpàkpa lí kũ ò kpàa pìnõla.

⁴ À a wondonõ bõbo didikõana dõro aakõkõ, n are dõdõkõana.

⁵ Kpé pì lénõ lei kũ a yàasao pínki leelemε. A lénõ mèn aakõkõ dire kpa kũ la kpao, n are dõdõkõana.

⁶ À lígbano pètepete kpé pì kpélele. Kpélele pìi gbàna kà gàsákuru bupla akuri, a yàasa sõ baraakuri. À gānu bò lígba pìnõ are, akũ à lígbano pètepete à èda dõ gānu pì léa.

⁷ À a kiblegbaa dìte gānu pìn. Gwen àdi yā gõgõn, akũ òdi pi Yākpatekεkpe. À sida lí lèketenõ nàna a gbàia zaa zĩte ari a sakaa.

⁸ A kpé kũ àdi in kú are. À bõkõa kũ gānu pìio. Len kpé kũ à dõ Firi'auna nénõgbẽ kũ à sè nõ ùne de le dõ.

⁹ Kpé pìnõ bona, gbè mananõn ò pèteo ari à gèe pé a sakaa. Ò gbèe pìnõ yõ gbasa ò zõzõkõre kũ sàkasakaa kpa plapla pínki. Lemε on kpa de le kũ bàai kpao.

¹⁰ Ò kpé pìnõ ẽ pète kũ gbè gbèntẽ mananõ, a kenõ gbàna kà gàsákuru kuri, a kenõ sõ soraakõ,

¹¹ gbasa ò bò kũ gbè mana kũ ò yõ ò àno kũ sida lío.

12 À bīni bò à līka ɔn zōkō pīii, à gbè kū ò àno vī didikōana dōro aakō, akū sīda lí kū ò àno kpákpa a musu, lákū Dikiri kpé kū a èdaao ɔn bīni de nà.

Dikiri ɔn póno

13 Kína Sulemanu gbēno zī ò Huramu sísi zaa Taya, akū ò sù kāao.

14 Huramu pì da bi Nafatali burimε, akūsō gyaanoμε. A de bi Taya gbēmε, akūsō mōgotē ɔzīkeriimε. Huramu pì ɔndō kū asānsīnio kū dōnaao vī mōgotē zī sīnda pínki gūn. Kū à sù kína Sulemanu kīnaa, akū à zī kū à dàare kè pínki.

15 À mōgba pì mèn pla kū mōgotēo. A pínki lei kà gāsākuru baro plansari, a lé yàasa kà kuri awεεpla.

16 À a fūraa pì kū mōgotēo mèn pla à kùte mōgba pìno musu. Fūraa pìno lei kà gāsākuru ɔɔɔɔro.

17 À mōkakōananɔ pì, akū à fīfī a fūraa pìnoa lán mōwakare bà, ò lokolokona mèn suppla.

18 À póno pì lán bīsi néno bà à dōdo mōgba fūraa pìnoa à likai dōro pla, mōkakōanaa pìno gēi kū a musuo. A fūraa pìnon leεleme pínki.

19 À Dikiri kpé èdaa mōgba fūraa pìno pì kū dōnaao lán tafetira vú bà. Tafetira vú pìno lei kà gāsākuru siisiikō.

20 Bīsi né pìnon dōdo mōgba fūraa pìno kūdōki musu mèn wàa dodo likana mōkakōanaa pìnoi dōrodōro.

21 Akū à mōgba pìno pètεpεte kū ò Dikiri kpé èda kūna. À tó kpà ɔpla pónε Ani Káte, ɔze pó sō Gbāna Kúa.

22 Mōgba pìno fūranɔ bò lán tafetira vú bà. Len à mōgba pìno pì le pínki.

23 À mòò kàsa íkaki ũ bùkutu. A lé la kpa ari a lé dire kpa kà gàsákuru kuri, a lei kà gàsákuru sɔɔro, a lé yàasa sɔ̄ baraakuri.

24 À ɔ̄zĩ kè íkaki p̄ia lán tũrunɔ̄ bà, à l̄ika a léi ḡei d̄orɔ̄ pla, gàsákuru do p̄ínki tũru mèn kuri. À íkaki p̄ii kàsa l̄ēl̄ē kũ tũru wānzānde p̄inɔ̄.

25 Íkaki p̄i di z̄usa mèn kuri aw̄ēēplanɔ̄. Z̄u mèn aak̄ɔ̄nɔ̄ m̄i d̄o gugbānduru kpa, mèn aak̄ɔ̄nɔ̄ if̄ālete kpa, mèn aak̄ɔ̄nɔ̄ ḡènɔ̄mid̄ɔ̄ki kpa, mèn aak̄ɔ̄nɔ̄ s̄o if̄aboki kpa. Íkaki p̄i di n̄ musu, ak̄ūs̄o n̄ p̄or̄ɔ̄nɔ̄ d̄ɔ̄d̄o guragurā.

26 Íkaki p̄ii ḡēgetee kà ɔ̄la yàasa ũ. A s̄a de lán oro s̄a bà, lán tafetira s̄a bà. Dir̄ɔ̄m lé w̄aa do ín àdi sí.

27 À tadib̄ɔ̄nɔ̄ p̄i kũ m̄ògot̄ēo mèn kuri. N̄ p̄ínki gb̄àna kà gàsákuru siik̄ɔ̄, a yàasa d̄o siik̄ɔ̄, a lei s̄o aak̄ɔ̄.

28 Kũ ò tadib̄ɔ̄ p̄inɔ̄ p̄i, ò m̄ò l̄èket̄ēnɔ̄ kp̄a à gb̄áno dagura.

29 Akũ ò m̄úsu wānzānno kè m̄ò l̄èket̄ēē p̄inɔ̄a p̄ínki kũ z̄usa wānzānno kũ kerubu wānzānno. Ò l̄ávut̄āna wānzān kè m̄úsuu p̄inɔ̄ kũ z̄usa p̄inɔ̄ musu kũ a ḡēio.

30 Tadib̄ɔ̄ p̄inɔ̄ m̄ògot̄ē gére kũ ḡòoo v̄i mèn siisiik̄ɔ̄. Ò gb̄á v̄i mèn siisiik̄ɔ̄ d̄o. Gb̄á p̄inɔ̄ musun òdi ta din. Ò gb̄á p̄inɔ̄ kàsa, ò l̄ávut̄āna wānzān kè a kpa siik̄ɔ̄a.

31 Tadib̄ɔ̄ p̄inɔ̄ lé w̄ēna bùkutu, a lé kpa bona gàsákuru do, ak̄ūs̄o à l̄òkotoo kà ɔ̄t̄ā do. Ò wānzān kè a lé kũ à b̄ò musua d̄o. Tadib̄ɔ̄ p̄inɔ̄ m̄ò l̄èket̄ē kusurud̄ēnɔ̄ v̄i, ò de bùkuturo.

32 Gére p̄inɔ̄n kú m̄ò l̄èket̄ēē p̄inɔ̄ ḡei. A ḡòno pépena

tadibɔɔ pìnɔ gbána. Gére pìnɔ lei kà gàsákuru do kũ a kusuo.

³³ Ò gére pìnɔ pì lán sōgo pɔ̀ bàme. Ò a gònɔ kũ a gérenɔ kũ a m̀tererenɔ kũ a oronɔ kàsa kũ m̀gotẽo pínki.

³⁴ Tadibɔɔ pìnɔ kũki vī mèn siisiikõ a kusurunɔa.

³⁵ Tadibɔɔ pìnɔ musu de b̀kutu, a lei kà ɔtā do. A gbánɔ kũ a m̀ l̀ketenɔn na tadibɔɔ pìnɔ musu.

³⁶ À kerubu wānzān kè a gbánɔ kũ a m̀ l̀ketenɔa kũ músu wānzānnɔ kũ domina línɔ wānzānnɔ, gu kũ à lè pínki. À lāvutāna wānzān kè à likai dɔ.

³⁷ Len à tadibɔɔ pìnɔ pì ɛ. À kàsa pɔ̀ dokõnɔ gũmme, n̄ z̄k̄k̄ke kũ n̄ bonaaɔ ɛɛɛme.

³⁸ Akũ à dàgaa pì kũ m̀gotẽo mèn kuri. A pínki dī í sí dirɔm lé siisiikõ. Dàgaa pìnɔ yàasa kà gàsákuru siisiikõ. Kũ à dàgaa pìnɔ didi tadibɔ mèn kurii pìnɔa,

³⁹ akũ à kàte Dikiri kpé are, mèn sɔɔro ɔplai, mèn sɔɔro ɔzei. À íkaki p̀i d̀te ɔze kpa Dikiri kpé kusuru kũ à kú ifāboki gènɔmidɔki kpa sare.

⁴⁰ Akũ Huramu oro túbukabɔnɔ kũ a sétɛbɔnɔ kũ ta arusibɔnɔ pì dɔ. Len à Dikiri ɔn zī kũ kína Sulemanu dàare kè ɛ, à a lakiti kè pínki.

⁴¹ Zī kũ à kèe pìnɔn dí: M̀gba mèn pla, a f̀ura kũ à b̀o lán lo bà kũ à kú m̀gba pìnɔ musu mèn pla, m̀kakõana kũ à zā blèo a f̀uraa pìnɔa mèn pla,

⁴² b́isi né kũ à d̀dɔ m̀kakõanaa pìnɔa musu mèn wàa pla. À kè ari d̀rɔ pla zāblebɔ ũ m̀gba f̀uraa pìnɔa.

⁴³ Tadibɔɔ pìnɔ mèn kuri kũ a dàgano mèn kuri.

⁴⁴ Íkaki mèn do kũ z̀usa kũ à kú a z̄itenɔ mèn kuri awɛɛpla.

⁴⁵ Túbukabɔɔ pìnɔ kũ a sétébɔɔ kũ ta arusibɔɔ. Pó kũ Huramu pì kína Sulemanunε Dikiri ɔn pɔ ũnɔ pínki, à n pí kũ m̀gotē kũ ò l̀bɔɔmε.

⁴⁶ Kína tò ò pɔ pìnɔ kàsa kũ Yoda gb̀lio zaa Suko kũ Zaretāo dagura.

⁴⁷ Sulemanu dí tó ò pɔ kũ ò pì kũ m̀gotēoo pìnɔ yɔ kilooa à a t̀kisi d̀ro, kũ à kè dasi yāi.

⁴⁸ Sulemanu pɔ kũ à kú Dikiri kpé gūnnɔ pì dɔ, turaretitikpataki kũ ò kè kũ wuraaoo kũ wura teburu kũ òdi Dikiri burodi kátεaao

⁴⁹ kũ fitiladibɔ kũ ò kàte kpéda gūn kpéne are ɔplai kũ ɔzeo mèn ɔɔɔro. Ò pì kũ wuraaoo atēne kũ a fitilanɔ kũ a kpàkonɔ pínki, ò lávu wānzān kēm̄ma.

⁵⁰ À wura tokonɔ pì dɔ kũ fitiladεbɔɔ kũ tanɔ kũ ḡmbɔɔ kũ tésibɔɔ kũ kpéne kũ òdi pi Ludakuki gb̀a asigbenɔ kũ kpéda pónɔ.

⁵¹ Kũ kína Sulemanu Dikiri ɔn zī pìi kè à làka pínki, akū à sù kũ wuraaoo kũ andurufuuo kũ pɔ kũ a de Dauda d̀te Dikiri pɔ ũnɔ, akū à kà Dikiri ɔn aruzεkεkatekin.

8

Tana kũ Dikiri àkpatii a kpén

¹ Akū kína Sulemanu Isaraila gb̄ε z̄k̄ɔnɔ sisi Yurusalemu, n buri don'arɛdenɔ kũ n ɔmbedenɔ n pínki, de ò su ò Dikiri bàka kunna kũnwo àkpati sé Dauda w̄te kũ òdi pi Zaiɔ ò suo.

² Akū Isarailanɔ kàkara a are n pínki mɔ supplade Etanimu dikpεgɔrɔ zī.

³ Kũ Isaraila gb̄ε z̄k̄ɔnɔ kàkara n pínki, akū sa'orinɔ Dikiri àkpatii pìi sè

4 kũ dakarɛki kutao kũ Dikiri pɔ́ kũ ò kú a gũnno. Sa'orino kũ Levi burino mé ò pɔ́ pino sè ò sùo,

5 akũ kina Sulemanu kũ Isaraila kũ ò kàkaraaino sa ò kũ sãno kũ zũno àkpatii pì arɛ. Pɔ́ kũ ò sa òoo pino dasi kè zɔ́kɔ́, adi sí naroro.

6 Akũ sa'orino gè kũ Dikiri bàka kunna kũnwo àkpatiio a kpén ari kpéne kũ òdi pì Ludakukin. Ò dìte a dìtekiã gwe kerubuno gèi.

7 Kerubuu pino dèmberenon poroporona àkpatii pì kũ a sèlinola.

8 A sèli pino gbàna ari òdi n lé e Dikiri kpé kpéda gũn, ama òdi e onno. Lí pino kú gwe ari kũ a gbãrao.

9 Póke kú àkpatii pì gũnlo, tó adi ke gbè anlo mèn pla kũ Musa dân zaa Orebu, gu kũ Dikiri pì a bàka nigɔ́ kú kũ Isarailano n bona Misila gbera baasiro.

10 Kũ sa'orino bôte Dikiri kpén, túsukpe kpé pì pà,

11 odi fɔ́ ò gè ò n zĩ ke gwero túsukpe pì yã, zaakũ Dikiri gakuri a kpé pà.

12 Akũ Sulemanu pì: Dikiri pì ániɔ́ kú túsukpe sira gũmme.

13 Akũ à pì Dikiriɛ: Ma kpé naasi díkĩna bõnne, nɔ́ kú a gũn gɔ́ɔ sĩnda pínki.

14 Akũ à lite à arɛ dò paria à sa mana ònne.

15 Akũ à pì: Ò Dikiri Isarailano Luda sáabu kpá! À lé sè ma de Daudanɛ, akũ à pàpa. Zaakũ à pì,

16 zaa gɔ́ɔ kũ a a gbè Isarailano bôte Misila, ádi Isaraila wète ke dìte ò kpé bon arero. Daudan a sè a gbè Isarailano don'arède ũ.

17 Kũ ma de Dauda ye à kpé bo Dikiri Isarailano Ludanɛ,

18 akū Dikiri pìne kpébonaare de a tó gō kúa laasun kū à kèe pì mana,

19 ama adi ke àkū mé ani boarero, a zīda né ke mé ani boare.

20 Akū Dikiri kè lākū à a lé sène nà. Ma gō ma de Dauda gēne ū, ma vute Isaraila kpatan lākū Dikiri Isarailanŋ Luda a lé sè nà, akū ma kpé dí bōne de a tó gō kúa yāi.

21 Gwen ma Dikiri àkpati diteki kèken. Dikiri bàka kunna kū ó dizinŋ n̄ bona Misila gbera yā kú a gūn.

Sulemanu aduakena a gbēnne

22 Sulemanu are dō Dikiri gbagbakia Isaraila kū ò kakarana gwenŋ wára n̄ pínki, akū à a onŋ sè musu

23 à pì: Dikiri Isarailanŋ Luda, gbēke dì sí lekōa kūnwo musu ke zītero. N gbēke gūn n bàka kú kū n zòbleri kū ò té n zén kū nèsedoonŋ.

24 N yā kū n a lé sè n zòbleri ma de Daudane pàpa. N ò kū léome yā, gbāra sà n pàpa.

25 Tera sà Dikiri Isarailanŋ Luda, n lé sè n zòbleri ma de Daudane n pì, tó a burinŋ n̄ zīda kūna dō akūsō ò té n zén lākū à téi nà, onigō kú Isaraila kpatan goro sīnda pínki.

26 Isarailanŋ Luda, n̄ tó yā kū n ò n zòbleri ma de Daudane ke yāpura ū sà.

27 Ama Luda, ñigō kú zīte la yāpura yá? Musu kū a leikeo ni fō à n síro, bele kpé kú ma bōnne díkīna sàa?

28 Dikiri ma Luda, n̄ laakari dō makū n zòbleriia, n̄ ma aduakena kū ma kutekenaó sí. Ñ sã kpá ó kū makū n zòbleri maten dōnyī kū adua kū maten kemmao gbāra.

29 Ñ tó n wé gō pena kpé díkĩnaa gwāani kũ fānantēo, gu kũ n pì n tó nigō kúa díkĩna pìi. Ñ adua kũ makũ n zòbleri madì ke aredona gu día ma.

30 Tó makũ n zòbleri ke n gbē Isarailano are dō gu día, tó ó wé kemma, ñgō ó wékena sí zaa n kúkia musu ñ sùru ke kũoo.

31 Tó gbē taari kè a gbēdakenε, akũ ò pìne à yā sí kũ n tóo, tó à sù à yā sì kũ n tóo n gbagbaki dí are,

32 ñgō ze kũńwo zaa n kúkia musu ñ mońne. Ñgō yā gōgō n zòblerinone ñ yā da taaridela, de a yākena wí a musu ñ yā nna kpá taarisaridea, de ò le ò dō kũ à yāke vīro.

33 Tó n gbē Isarailano ibereño zìi blèmma durunna kũ ò kenne yāi, ò tà kũńwo, tó ò era ò are dōmma ò n sisi, tó ò wé kemma ò kúte kenne kpé díkĩnaa,

34 zaa n kúkia musu ñgō ze kũńwo ñ sùru ke kũńwo kũ ñ durunnao, ñ su kũńwo bùsu kũ n kpà ñ dizinoo díkĩna pìi gũn.

35 Tó ludambe gō da wárawara, legũ dì maro kũ ò durunna kenne yāi, tó ò are dō gu díkĩnaa ò wé kemma ò n sisi, akūsō ò kpe li ñ durunnaε kũ n wé tāmma yāi,

36 zaa n kúkia musu ñgō ze kũńwo ñ sùru ke kũńwo kũ ñ durunnao. Ñgō ñ da zé manan, ñ tó legũ ma n bùsu kũ n kpà n gbēnoa ñ pó ũ dí gũn.

37 Tó nà ke gagagyā kà bùsu dín, ke pówesirakũ ke pópukpana ke kwanō ke kwa'eseblerino ke tó ibereño lika ñ wēte kei ke tó kisira ke gyā gē ñ té,

38 tó ñ gbēke yā kũ à a le dō, tó à a o dō kpé díkĩna kpa, tó à wé kemma à kúte kenne,

39 zaa n kúkia musu ñgō ze kãao ñ sùru ke kãao, ñ

kpáí. Ngõ fīna bone a yākenaaa, zaakū ń a nèse dō. Mòkōn mé ń gbě sīnda pínki nèse dō.

⁴⁰ Len onigō vīna kenne le ari ń wèndi lén bùsu kū n kpà ń dizin̄a dīkīna gūn.

⁴¹⁻⁴² Zaakū oni n tó zōkō kū n gāsā gbānao kū n ɔ kū à poronaa baaru ma, tó gbě zītō kū à de n gbě Isaraila buri ūro bō bùsu zāzān à sù n tó yāi, tó à are dō kpé díá à wé kemma,

⁴³ zaa n kúkia musu ngō ze kāao n̄ yā kū à wé kemma kene, de andunia buri sīnda pínki le à n tó dō, ò vīna kenne lākū n gbě Isarailan̄o dī kenne nà, onigō dō kū n tó kú kpé kū ma bō díá.

⁴⁴ Tó n gbēn̄o bōte ò gèe zī ká kū ń iberen̄o, bee gu kū n n̄ zīn pínki, tó ò are dō wēte kū n sè díá kū kpé kū ma bōnne díó, tó ò wé kemma,

⁴⁵ zaa n kúkia musu ngō ze kūn̄wo kúte kū ò kenne yāi, n̄ yā nna kpám̄ma.

⁴⁶ Zaakū gbēke dī gí durunna keiro, tó ò durunna kenne, tó n p̄o fēnyī n n̄ ná n̄ iberen̄one n̄ ɔī, tó ò tà kūn̄wo n̄ bùsun zīzōn̄o ū bùsu zāzā ke a kānin yá,

⁴⁷ tó ò nèsee lite bùsu kū òten zò blen p̄i gūn, tó ò èra ò kúte kenne gwe ò p̄i: O durunna kè, o taari kè, o yā vāni kè,

⁴⁸ tó ò are dōmma kū nèse mèn doo kū n̄ p̄oyeinaao pínki zaa bùsu kū òten zò blen n̄ iberen̄one p̄i gūn, tó ò are dō bùsu kū n kpà n̄ dizin̄a kū wēte kū n sèeo kū kpé kū ma bōnne díooa, tó ò wé kemma,

⁴⁹ zaa n kúkia musu ngō ze kūn̄wo kúte kū ò kenne yāi, n̄ yā nna kpám̄ma.

⁵⁰ Ngõ sùru ke kū n gbě kū ò durunna kennēn̄o kū taari kū ò kèeo, n̄ tó gbě kū òten zò blēn̄en̄o n̄

wēnda gwa,

⁵¹ zaakū n póvīnanŏmε, n gbē kū n ń bóte Misilanŏ wétamma pásī gūnnŏmε.

⁵² Ñ tó n wé gŏ kú makū n zòbleriia, ñ sã kpá kúte kū ma kènnei kū kúte kū n gbē Isarailanŏ kènneo. Ñ sã kpányī gŏŏ kū ò wiki lèmma pínki.

⁵³ Dikiri Luda, zaakū andunia buri sīnda pínki gūn mókŏnŏn n ń sé n gbēnŏ ũ, lákū n ò n zòbleri Musa gāi nà gŏŏ kū n ó dizinŏ bòte Misila.

⁵⁴ Gŏŏ kū Sulemanu ten wé ke Dikiria, à kutena a kosoame kū a ŏŏŏ porona musu. Kū à adua kè à làka, akū à fùte à zè Dikiri gbagbakia gwe,

⁵⁵ akū à sa mana ò Isaraila kū ò kú gwenŏne ń pínki, à ò gbānagbāna à pì:

⁵⁶ Ò Dikiri sáabu kpá, zaakū à ókŏŏ a gbē Isarailanŏ gbà ĩampaki lákū à ò nà. Yã mana kū à a lé sè a zòbleri Musa gāinŏ pāpa pínki, a ke dí léte pāro.

⁵⁷ Dikiri ó Luda gŏ kú kūoo, lákū à kú kū ó dizinŏŏ nà. Àsun ó tónlo, àsun pã kpáwáiro.

⁵⁸ À tó ò swè kpáawa ògŏ té a zén, ògŏ a yāditenanŏ kūna kū yã kū à dà ó dizinŏnenŏ, ògŏ a ɔɔki gwa.

⁵⁹ Adua kū ma kè Dikiri ó Ludaa gŏ dŏn fānantē kū gwāanio. Àgŏ yã nna kpá makū a zòbleriia kū a gbē Isarailanŏ lákū gu dīgŏ dŏ nà,

⁶⁰ de andunia buri sīnda pínki le à dŏ kū Dikiri bi Ludame, a pānde kunlo.

⁶¹ À kù à á swè kpá Dikiri ó Ludaa mámmam, àgŏ a ɔɔki gwa, àgŏ a yāditenanŏ kūna lákū á kūna gbāra nà.

Dikiri ŏn sakēnaa

⁶² Akū kína kū Isarailanŏ ń pínki sa ò Dikiria.

⁶³ Sulemanu kennakūkōso sa ò Dikiria kũ zùno dúbu baro awεεpla kũ sãno dúbu basuddo. Len kína kũ Isarailano ñ pínki Dikiri on sa kè ε.

⁶⁴ Zĩ pìia kína gbã bò on kũ à kú Dikiri kpé kpéleεaanε, akũ à sa'opo kũ òdi ká tén à té kũ ò gwe kũ póblewε gbao kũ kennakūkōso sa nísio, zaakũ sa'oki kũ à kè kũ m̀gotεo kũ à kú Dikiri kpé kpéleεa zōkōro, adi f̄ à s̄i pínkiro.

⁶⁵ Zĩ birea Sulemanu kũ Isarailano ñ pínki dikpe kè Dikiri ñ Ludanε ari goro suppla, akũ ò Kutadona dikpe kè goro suppla do. A pínki kè goro gēro don-sari. Ò dasi manamana, ò bò zaa Lebo Amata ari à gēε pé Misila b̄usu lézεki swaa.

⁶⁶ A goro soraakōde zĩ à ñ gbárε, akũ ò lé z̄aa ò tà ñ bea kũ ponnao. N̄ p̄o kè nna yã mana kũ Dikiri kè a z̀bleri Dauda kũ a gbē Isarailanone pínki yã.

9

Dikiri bo à suna Sulemanua

¹ Kũ Sulemanu Dikiri onn kàte à làka kũ a onnwo kũ zĩ kũ a p̄o kúano pínki,

² akũ Dikiri èra à bò à s̄ua a ḡen pladeo lákũ à bò à s̄ua Gibiō nà

³ à p̄ine: Ma adua kũ n kè kũ kúte kũ n k̄emenεoo mà. Ma kpé kũ n bòo p̄i d̄ite ma p̄ó ũ, ma t̄o nigō kúa lakanaa sari. Ma wé nigō kúa, ma p̄o nigō kúa.

⁴ M̄okōn s̄o, t̄o ñ té ma z̄én s̄usu kũ n̄εε purao lákũ n de Dauda bà, t̄o ñ yã kũ ma d̄itenneno kũna kũ ma yã'onnenano, t̄o n̄teni ma ōd̄oki gwa,

⁵ mani n kpata z̄ini péte Isarailano té, anigō lakana v̄iro, lákũ ma a lé s̄è n de Daudanε nà, ma p̄i a burino nigō kú Isaraila kpatan goro s̄inda pínki.

6 Tó mǎkšn ke n néno kpe limene sō, tó á ma dokayāno kū yā kū ma òteáreno kūnaro, tó a ge do tānanōi ari áteni n gbagba,

7 mani Isarailano bote búsu kū ma kpàrman, mani gí kpé kū ma òte ma pó ũ pìii, oni gō lalandi pó ũ, pina pó ũ buri sīnda pínkiné.

8 Bee kū kpé pì naasikeo, a yā ni bo gbē kū òten gēte a sareno sare. Oni suru gá ò pi: À kè dera Dikiri kè búsu dí kū kpé díooné lee?

9 Oni piñne: Kū ò pā kpà Dikiri n Luda kū à n dizino bote Misilai yāime. Ò zè kū tānāno, òteni n gbagba òten kúteñne. Abire yāin Dikiri kisira dí zīrma pínki.

Sulemanu yākena kparano

10 Sulemanu on mèn pla pino kàe wè barome, Dikiri on kū a zīda beo. Abire gberan

11 à Galili búsu wēte kpà Taya kina Hiramua mèn baro, zaakū Hiramua sida lí kū pini lío kū wurao kpàa lākū à yei nà.

12 Kū Hiramua bò Taya à gèe à wēte kū Sulemanu kpàawanō gwà, adi kenero,

13 akū à pì: Ma gbē, wēte kpate takanōn n kpàma gwee? Akū ò tó kpà gu pìine Kabulu ari kū a gbārao.

14 Hiramua gīnake à wuraa kpàzā Sulemanune yā ton siikō.

15 Gbē kū Sulemanu n dá zòzīnno yān dí. Gbē pino mé ò Dikiri on kū Sulemanu onnwo zī kè. Ò Milo wèee tàta kū búsuuo, ò Yurusalemu bīni bò, ò era ò Azo kū Megidoo kū Gezao kèkè ò kàte.

16 Misila kína Firi'auna lète Geza pìia yā, akū à sī à té s̄a à Kanaa kū ò kú a gūnno dède, akū à kpà a nénogbēa zākena gba ũ goro kū à a kpàzā Sulemanua.

17 Akū Sulemanu èra à Geza pìi kèke à kàte kū Bètoroni gēi p̄o

18 kū Baalao kū Tadamō kū à kú a b̄usu gbārannanwo

19 kū wēte kū à kusuna kàtenno kū wēte kū a s̄gonō kū a s̄non kunnō kū kpé kū à ye à dō Yurusalemuno kū Lebanao kū b̄usu kū àten kí bleano p̄inki.

20 Buri kū ò de Isaraila ũronō: Amōrinō, Itinō, P̄erizinō, Ivinō kū Yebusi kū ò ḡnō n̄ p̄inki,

21 gbē kū Isarailano dí f̄s ò n̄ dederono, n̄ buri kū ò ḡs̄ n̄ b̄usu p̄innōn Sulemanu n̄ dá zòz̄in, akū òdigō z̄i p̄i ke le ari kū a gbārao.

22 Adi Isarailano da zòz̄inlo. Mókōnon à n̄ díte a z̄ikarinō ũ, a ìbano, a kína dakenō, a gbēno don'aredeno, a s̄godeno, a s̄deno.

23 Mókōnome z̄i kū òten ke p̄i gbē z̄ōkōno ũ dō, ò gbēnon wàa pla kū basuppla akurio.

24 Kū Firi'auna nénogbē bò Dauda wēten à tà a kpé kū Sulemanu bòaren, a gberan Sulemanu Milo wēee tàta.

25 Wē kū wēeo Sulemanu dìgō sa o ḡn̄ aakōkō. Àdi sa'opo kū òdi ká tén à té kū k̄ kennakūkō sa'opo o sa'oki kū à bò Dikiriēea, àdi turaretiti kpata Dikiri are gwe dō. Len à Dikiri on z̄ino kè le mámmam.

26 Kína Sulemanu gó'iteno kè Eziš Geba Elata sare Edomu b̄usun Isira Tēra léa.

27 Hiramū a góde kū ò ísira d̄no z̄i, akū ò dì ísira musu lēle kū Sulemanu gbēno.

28 Ò gèe Ofi, ò wuraa sète gwe tɔn gëro ò sùo kína Sulemanune.

10

Seba bùsu saraunia suna Sulemanu kĩnaa

¹ Kū Seba bùsu saraunia mà lákū Sulemanu tó bò nà Dikiri yā musu, akū à sù a yō à gwa kū yā zī'ū gbekanaao.

² À kà Yurusalemu kū a ìbanɔ dasidasi kū pó gbī nnanɔ kū wura sà zókɔɔo kū gbè bèereɛde kū lakuminɔ senanɔ, akū à gèe Sulemanu kĩnaa à yā kū à kú a nèsee gūn fàaii bò kãao pínki.

³ Akū Sulemanu yā kū à làlaawanɔ bókɔtene pínki. A ke bókɔtena dí a furo.

⁴ Kū saraunia pì Sulemanu òndɔyānɔ mà pínki, akūsɔ à a be kū à bòo è

⁵ kū póbile kū àdi blenɔ kū a ìbanɔ gwenaao kū a be zīkerinɔ kunnaao kū n pókasanɔ kū a wēkpaaterinɔ kū sa'opɔ kū òdi ká tén à té kū kū à ò Dikiri ɔnnnɔ, yā pìi a kù gbāna, akū a lé wè.

⁶ Akū à pì kínane: N yākenanɔ kū n òndɔ baaru kū ma mà zaa ma bùsunwo bi yāpuramε.

⁷ Mádi yā pìnɔ síro ari ma ge ma kao la, akū ma wé siale sà. Odi omene pínki sero fá! N òndɔ kū n aruzekenɔn de lákū ma a baaru mà nàla zà.

⁸ Mìnnadenɔme n gbēnɔ ũ kū n ìba kū òdigɔ kú kúnwo gɔrɔ sīnda pínki, ògɔ n òndɔyā manɔ!

⁹ Ò Dikiri n Luda sáabu kpá, zaakū n yā kàagu, akū à n ka Isarailanɔ kpatan. Yenyī kū Dikiri vī kū Isarailanɔ gɔrɔ sīnda pínki mé à tò à n ka kína ũ, de ògɔ yā gōgōñne a zéa.

¹⁰ Akū saraunia pì kína gbà wura tɔn siikɔ kū pó gbī nnanɔ dasidasi manamana kū gbè bèereɛdenɔ.

Pó gbĩ nna kū à kína Sulemanu gbàa pìno zōkō, gbēke dí suone à kà le ziki doro.

¹¹ Hiramú gó'ite kū ò sù kū Ofio kū wuraaonŋ sù kū lí bèeredenŋ manamana kū gbè bèeredenŋ dŋ.

¹² Akū kína Dikiri on pónŋ kèo kū a zīda be pónŋ, à mŋrŋnŋ kū gidigbonŋ kèo lèsirinŋne dŋ. Odi su kū lí pì burio à kà le ziki doro, odi wé si a takale doro ari kū a gbārao.

¹³ Pó kū Seba būsú saraunia pì yei pínki à gbèka kína Sulemanua, akū à a gbà, gba kū à kènne yōnkŋyōnkŋnŋ baasi. Akū à èra à tà a būsun kū a ibanŋ.

Sulemanu gakurike

¹⁴ Wura kū àdi su Sulemanua wè kū wèeo dì ká tŋn baro awèe'aakō,

¹⁵ táfe kū táa'orinŋ kū lagatarinŋ kū Larubu kínanŋ kū a būsú gbē zōkōnŋ dì suone baasi.

¹⁶ À sēgbako zōkōnŋ kè kū wura kū ò gbègbēeo mèn wàa do, ní baadi tikisii kà kiloo aakōkō kū a kusuo.

¹⁷ À sēgbako fítinnanŋ kèo dŋ, ní baadi tikisii ye à ká kiloo plapla. À sēgbako pìno kàte kpé kū òdi pì Lebana Líkpen.

¹⁸ Kína kíblegba zōkōŋ kè kū wisa sakaao, akū à wura atēne kùtea.

¹⁹ Gbàa pì didiki vī, a gbápeki mèn suddo. A kpenaki musu de mŋrŋ kusuru sari. À gàsādikinŋ vī, músu taka kū ò kènŋn zezena gàsādiki pìno sare.

²⁰ Músuu pìnŋn zezena gbápeki pìnoa kpa pla, a pínki kà kuri awèepla. Odi gbàa pìi taka ke būsú ken zikiro.

21 Kína Sulemanu tokono bi wuraame pínki. Kpé kú òdi pi Lebana Líkpe póno pínki bi wuraame atēne. Andurufu póke kú gwero, zaakū òdi andurufu dite póke ũ Sulemanu gɔɔaro.

22 Kína gó'iteno digō dina ísiralá kú Hiramú góno. Wè aakō pínki òdigō su kú wurao kú andurufuuo kú wisa sakaao kú gbakūno kú zāno.

23 Kína Sulemanu aruzeke kú a ɔndɔo zōkō de andunia kínano póla ní pínki.

24 Baadi pínki ten zé wete à wé si Sulemanulé à a ɔndɔyā kú Luda dāne a swèn ma.

25 Wè sīnda pínki baadi digō suné kú a gbao: Andurufu póno, wura póno, utano, zìkabono, pó gbī nnano, sōno kú baragbāsōno.

26 Sulemanu sōgono kú sōno kākara. A sōgo pino kà wàa suppla, a sōno sō dúbu kuri awεεpla. Òdi a sō pino gwa a sōgo wētēno gūn kú a be Yurusalemuo.

27 Kína tò andurufu gō di Yurusalemu lán gbèè bà, akūsō sida lí kú òdi kpé boo dasi lán bète lí bà sèn.

28 Òdi bo kú Sulemanu sō pino zaa Misila kú Silisia bùsuome. Kína lagatarino mé òdi gé lulu gwe.

29 Òdi sōgono lulu Misila andurufu ɔgo mèn wàa aakōme, sōno sō mèn basuppla akuri, akū àdi era à sō pino yía Iti kínano kú Siria kínano.

11

Sulemanu nono

1 Kína Sulemanu yè buri pānde noḡbēnoɔi dasi. Firi'auna nénogbē baasi, akū à Mɔabuno kú Amōnino kú Edōmuno kú Sidōdeno kú Itino sèse nono ũ.

² Dikiri pì Isarailanŋe òsun buri pìno séro, zaakū oni n̄ sātεμε, de ò té n̄ t̄anan̄i. Bee kū abireo n̄ yenyī Sulemanu kù gbāna.

³ À k̄inanen̄ sèse n̄n̄ ũ gbēn̄n wàa aakō kū bas̄oro, akūs̄ à n̄ yìgisariden̄ vī d̄ wàa do kū bas̄oro. Akū a n̄ pìno a sātε.

⁴ Kū zīkū ten gēn, a n̄n̄ tò à tè t̄anan̄i, adi a swè kpá Dikiri a Ludaa mámmam lán a de Dauda bàro.

⁵ À tè Sid̄den̄ t̄ana Asatorei kū Am̄nin̄ t̄ana M̄leki kū Luda z̄aquo.

⁶ À yā kū Dikiri yeiro kè, adi téi kū nèsedoo lán a de Dauda bàro.

⁷ Akū à gèe à t̄anagbagbaki bò s̄s̄i kū à kú Yurusalemu if̄aboki kpa musu M̄abun̄ t̄ana gina Kem̄sine kū Am̄nin̄ t̄ana gina M̄lekio.

⁸ Len̄ à kè le a buri p̄ande n̄n̄ne n̄ p̄inki, akū ò turaretiti kp̄ata n̄ t̄anan̄ne ò sa òr̄ma.

⁹ Akū Dikiri Isarailan̄ Luda p̄ fè Sulemanui kū à kpe l̄ne a swè kúa doru yāi, zaakū Dikiri bò à s̄ua yā gēn pla.

¹⁰ Bee kū Dikiri p̄ine àsun té t̄anan̄iro, adi yā kū Dikiri d̄te p̄i maro.

¹¹ Akū Dikiri p̄ine: Zaakū n̄ kè le, n̄di ze kū ma bàka kunna k̄nwo yā kū ma d̄tenneoro, mani kpata s̄imma mà n̄ z̄òblerin̄ doke ká n̄ gēne ũ.

¹² Ama n̄ de Dauda yāi mani ke le n̄ ḡoro, n̄ n̄n̄ mani kenε.

¹³ Bee kū abireo mani kpata s̄ia p̄inkiro. Buri leu don mani tó n̄ né p̄ine ma z̄òbleri Dauda kū Yurusalemu kū ma sè ma p̄o ũo yāi.

Sulemanu ibereŋo

14 Akū Dikiri tò Edomu gbē Adada kū à de kine ũ ibere sè kū Sulemanuo.

15 Goro kū Dauda ten zī ká kū Edomunō yā, a zīkarinō don'arede Yoabu gēe à Isarailanō gènō vī, akū à Edomu būsū gōgbēnō dède gwe n pínki.

16 Akū kū a gbēnōn kú gwe ari mō suddo ari ò gēe ò Edomu būsū gōgbē pìnō dède ò n pínki.

17 Kū Adada bàa sī, à ten tá Misila kū a de iba kenō. Goro birea sō Adada bi kefennamē.

18 Ò bō Midia ò gēe Parani, akū ò Paranide kenō sè ò gēe kūnwo Misila kina Firi'auna kīnaa. Firi'auna kpé kpàa kū pòbleo kū zīte.

19 Adada yā kà Firi'aunanē manamana, akū à a nanō Tapenesi dakūna kpàa nō ũ.

20 Akū Tapenesi dakūna pì né ì gōgbē ũ, òdi pine Genuba, akū Tapenesi né pì gwà Firi'auna onn kū Firi'auna nēnō lēle.

21 Goro kū Adada kú Misila, à mà kū Dauda gà akūsō a zīkarinō don'arede Yoabu gà dō. Akū à pì Firi'aunanē: Ñ ma gba zé mà tá ma būsun.

22 Akū Firi'auna a là à pì: Bó mé à ten kīamma ma kīnaa, gbasa n ye n tá n būsunn? À wèa à pì: Póke ten kīamaro, n ma gba zé dé!

23 Akū Luda tò dō Eliada né Rezō kū à bàa sī a dikiri Zoba kina Adadezanē yā fūte Sulemanui.

24 Kū Dauda Adadeza gbēnō dède, akū Rezō gbēnō kàkaraai ò kē gbānamōnnerinō gā ũ, akū à gō n don'arede ũ. Ò gēe ò vūte Damasuku, akū à gwe sī.

25 Rezōmē Isarailanō ibere ũ ari Sulemanu wēndi lén, yākete kū Adada fūte baasi. À kpata blè Siria būsun, à gī Isarailanō kái.

Yeroboamu bona Sulemanu kpe

²⁶ Nɛbati né Yeroboamu bi Sulemanu ìba kemε. Eflaimu burimε, kũ à bò Zεrεda, akũ à bò Sulemanu kpε. A da bi gyaanɔmε, a tón Zεrua.

²⁷ Lákũ à kè nà à bò kína kpεn dí. Sulemanu wèε kũ òdi pi Milo tàta kũ bùsuuo, akũ à a de Dauda wèτε bĩni bò à pèkεε.

²⁸ Yeroboamu bi négɔgbē laakaridemε. Kũ Sulemanu è kefenna pì kokari vī, akũ à a dìτε zī gbāna kũ Yusufu burinɔ ten κε pì gbē zōkō ũ.

²⁹ Gɔɔ birean Yeroboamu bò Yurusalemu, akũ à dàkarε kũ annabi Ahia, Silo gbēo zén, à uta dufu dana. Ò kú sèn gwe ní pla.

³⁰ Akũ Ahia a uta dufu pìi gà à kè à pàrapara leu kuri awεεpla.

³¹ Akũ à pì Yeroboamune à a paranaa pì sète mèn kuri, zaakũ Dikiri Isarailanɔ Luda pì: Mani Sulemanu bo kpatammε mà Isaraila buri leu kuri kpámma.

³² Mani buri leu do tónε ma zòbleri Dauda kũ Yurusalemu kũ ma sè Isaraila buri sīnda pínki wèτεnɔ téo yāi.

³³ Mani kεnε ε, kũ à ma zukūna à gèε àτεn Sidōdenɔ tāna Asatore kũ Mɔabunɔ tāna Kemɔsio kũ Amɔninɔ tāna Mɔlekio gbagba yāi. Adi témairo, adi yā kũ à manamεne kero, adi ma ɔɔki gwaro, à ma dokayānɔ kūna lán a de Dauda bàro.

³⁴ Bee kũ abireo mani kpata bo a ɔĩ sānsānlo, zaakũ ma gīnake ma a kè kína ũ ari a wèndi lémmε ma zòbleri Dauda kũ ma sè yāi, kũ à ma yāditenanɔ kūna akūsɔ à ma ɔɔki gwà.

³⁵ A nén mani kpata sí a ɔĩ mà Isaraila buri leu kurinɔ kpámma.

³⁶ Isaraila buri læu don mani tó a né pìine, de ma zòbleri Dauda buri gō kí blemene Yurusalemu goro sīnda pínki, wēte kū ma sè ma tó gō kúaa pìi.

³⁷ Mòkōn sō, ma n se Isarailano kína ũ, de ñgō kí ble pō kū n pō yeiia pínki.

³⁸ Tó nten yā kū ma dītene ke pínki, tó n témai, nten yā kū à manamene ke, tó nteni ma oðoki gwa akūsō n ma yāditenano kūna lán ma zòbleri Dauda bà, manigō kú kūnwo, manigō n burino ká Isaraila kpatan goro sīnda pínki, lākū ma Dauda burino kàn nà.

³⁹ Mani Dauda burino era kpe yā kū ò kèe pì yāi, ama adi ke goro sīnda pínkinlo.

⁴⁰ Sulemanu zé wēte à Yeroboamu de, akū à fùte à bàa sī à tà Misila kína Sisaki kīnaa, à gō gwe ari Sulemanu gèe à gào.

⁴¹ Sulemanu yā kparano kū òndōyā kū à kèno pínki kú Sulemanu yāno takadan.

⁴² Sulemanu kè Isaraila buri sīnda pínki kína ũ Yurusalemu wè buplame.

⁴³ Kū à gà, ò a vī a de Dauda wēten, akū a né Reoboamu vùte a gēne ũ.

12

Isarailano bona Reoboamu kpe

¹ Reoboamu gèe Sekemu, zaakū gwen Isaraila buri sīnda pínki gèen de ò a ká kína ũ.

² Kū Nebati né Yeroboamu a baaruu mà, akū à bò Misila à sù, zaakū gwen à kun zaa goro kū à bàa sī Sulemanun.

³ Akū Isaraila kū ò kō kākara pino a sīsi, akū ò gèe ò yā ò læle kū Reoboamu ò pì:

4 N de zĩ gbāna dàwɛɛ pāsĩpāsĩ. Mɔkɔn sɔ, ñ zĩ gbāna pì kũ aso tìkisi kũ à diwɛɛo lago, óni m̀ natɛnnɛ.

5 Akũ à wèmma à pì: À tá gĩa ari gɔɔ aakɔ, gbasa à era à su. Akũ ò tà.

6 Kína Reoboamu yā pìi gbà gbɛ zɔkɔ kũ ò de a de Sulemanu ìba ũnɔnɛ à pì: Yā kpaten a è à mana mà we gbɛ pìnɔaa?

7 Akũ ò wèa ò pì: Tó n m̀i nàtɛnnɛ gbāra, akũ n yā mana wèmma, onigɔ de n z̀blerinɔ ũ gɔɔ sĩnda pínki.

8 Akũ Reoboamu g̀i gbɛ zɔkɔ pìnɔ lédammai, à gɛɛ à yā pìi gbà a ìba kefenna kũ ò né blè lɛɛɛnɔnɛ.

9 À ñ lá à pì: Gbɛ kũ ò pìmenɛ mà zĩ gbāna kũ ma de dànnɛ lagońnɛ pìnɔ, yā kpaten a è à mana ò sínlaa?

10 Akũ kefenna pìnɔ wèa ò pì: Gbɛ kũ ò pìnne n de aso tìkisii dìnnɛ ñ lagońnɛ pìnɔ, ñ ońnɛ n ɔnekparɛ gb̀giri de n de pila.

11 N de aso tìkisii dìnnɛ, mɔkɔn sɔ, ñni aso pì karańnɛ. N de wé tãmma kũ flàaomɛ, ama flà lèden ñni wé tãómma.

12 A gɔɔ aakɔde zĩ Yeroboamu kũ Isarailanɔ era ò sù ò Reoboamu lè ñ pínki, lákũ à òńnɛ nà à pì, ò era ò su gɔɔ aakɔ gbera.

13 Akũ kína g̀i gbɛ zɔkɔnɔ lédammai à yā wèmma pāsĩpāsĩ.

14 À tɛ kefennanɔ lédammai à pì: Aso tìkisin ma de diáɛ, makũ sɔ mani aso pì karaáɛmɛ. Flàan ma de wé tãoáwa, makũ sɔ, flà lèden mani wé tãoáwa.

15 Akũ kína g̀i Isarailanɔ yā mai, zaakũ yā pìi bò Dikiri kĩnaamɛ, de yā kũ à ò Nebati né Yeroboamunɛ

annabi Ahia, Silo gbě gāi le à ke yāi.

¹⁶ Kū IsarailanƆ è kína gí n̄ yā mai, ò pìnɛ:

Ó bàka kú kū Daudaoro,

ó lé kú Yεε né yānlo.

IsarailanƆ, á baadi tá a bea!

Dauda buri, n̄ n zīda be kū!

Akū IsarailanƆ tà n̄ bea.

¹⁷ Isaraila kū ò kú Yuda burinƆ wēte gūnnƆn Reoboamu g̃ò n̄ kína ũ ado.

¹⁸ Kína Reoboamu a zòzī gbě zōkō Adoniramu zī IsarailanƆa, akū ò a pàpa kū gbèεo ò a dè. Akū kína Reoboamu fūte kū wānao à si a sōgo gūn à bàa si à tà Yurusalemu.

¹⁹ Len IsarailanƆ gí Dauda burinƆi le ari kū a gbārao.

²⁰ Kū IsarailanƆ mà n̄ pínki kū Yeroboamu sù, akū ò a sisi kōkakaranaa gūn, akū ò a kà Isaraila burinƆ kína ũ. Isaraila buri ke dí ze kū Dauda burinƆo doro, tó adi ke Yuda burinƆ baasiro.

²¹ Kū Reoboamu kà Yurusalemu, à YudanƆ kàkara n̄ pínki kū Biliaminu burinƆ. Zīkarii pìnƆ gbēnƆn dúbu bakēndome. Akū òten gé zī ká kū IsarailanƆ, de ò le ò Sulemanu né Reoboamu kpata sínɛ ò kpáa dɔ.

²² Akū Luda yā sù Luda gbě kū òdi pi Semayaa à pì:

²³ N̄ o YudanƆ kína Sulemanu né Reoboamunɛ kū YudanƆ n̄ pínki kū Biliaminu burinƆ kū gbě kparanƆ,

²⁴ makū Dikiri ma pì, àsun gé zī ká kū á Isaraila dakenƆoro. Á baadi tá a bea, zaakū yā kū à kèε pìi bò ma kīnaame. Akū ò yā kū Dikiri ònne mà ò tà.

²⁵ Yeroboamu Sɛkɛmu kũ à kú Ɛflaimu gu kpiden bĩni bò, akũ à vùten. Zaa gwen à gèe à Pɛnieli kèkè à kàte.

²⁶ Akũ à laasun lè à pì: Oni Dauda buri era kpatammɛ fá!

²⁷ Tó Isarailanɔ ten gé sa o Dikiri ɔnn Yurusalemu, oni era ò ze kũ n dikiri Yudanɔ kina Reoboamuomɛ, oni ma de ò ze kãao.

²⁸ Kũ kina yã pì gwà, akũ à wura zùsanɛ pì mèn pla, akũ à pì gbɛnɔnɛ: Isarailanɔ, á gena Yurusalemu mò le. Á dikiri kũ ò á bóte Misilanɔn dí!

²⁹ Akũ à a do dìte Bɛteli, a do sɔ ari Dã.

³⁰ Akũ yã pì gòrɔnɛ durunna ũ, òdi gé donyĩ ke a done Bɛteli, a do sɔ ari Dã.

³¹ Yeroboamu kpé bò zùu pìnɔnɛ tãnagbagbakinɔa, akũ à gbɛ dìte sa'orinɔ ũ, bee kũ gbɛ kũ ò de Levi buri ũronɔ.

³² Akũ à mɔ sɔraakɔde gɔrɔ gèrode dìte dikpɛ ũ lán Yudanɔ pɔ bà se, akũ à sa ò tãnagbagbaki kũ à kú Bɛteli pìia. À sa ò zùsanɛ kũ à pìi pìnɔa, akũ à sa'orinɔ dìte gwe.

³³ Akũ à sa ò sa'oki kũ à kè Bɛteli pìia mɔ sɔraakɔde gɔrɔ gèrode zĩ. Gɔrɔ pìn à dìte a zĩda pɔyeinaaa dikpɛ ũ Isarailanɔnɛ.

13

Luda gbɛ lékena Bɛteli sa'okine

¹ Luda gbɛke bò Yudanɔ bùsun à sù Bɛteli lákũ Dikiri dànɛ nà gɔrɔ kũ Yeroboamu zena sa'oki pìi sare de a sa o.

² Akũ à lé kè sa'oki pìnɛ à pì: Sa'oki, sa'oki, Dikiri pì oni né i Dauda bea, oni tó kpánɛ Yosia. Àkũ mé

ani sa omma kũ tãnagbagbaki sa'ori kũ òten zĩ ke lanŋ, ani bisãsiri wãnŋ kpátamma.

³ Gwe gŋnŋ Luda gbẽ pì yã pì kena sèedaa òrĩne à pì: Sèeda kũ Dikiri òn dí. Sa'oki pì ni parakõre a túbu ni kóte.

⁴ Kũ kína Yeroboamu lé kũ Luda gbẽ pìi kè Beteli sa'oki pìine mà, akũ à ɔ d̀aa zaa sa'okia gwe à pì: À a kũ! Akũ ɔ kũ à d̀aa pìi gbàgbã, ani f̃ à kòko doro.

⁵ Akũ sa'oki pìi parakõre a túbu kòte lákũ Dikiri dà Luda gbẽ pìine à ò nà.

⁶ Akũ kína pì Luda gbẽ pìine: Ñ kúte kemene Dikiri n Ludane. Ñ wé keamene de ma ɔ le à su a gbèn. Akũ Luda gbẽ pì kúte kè Dikiri, akũ a ɔ sù a gbèn lán yã bà.

⁷ Akũ kína pì Luda gbẽ pìine: Ñ m̀ó ò gé ma bea ò p̀ó ble mà gba kenne.

⁸ Akũ à pì kína pìine: Bee tó n n aruzeke kpado kpàma, mani gé kúnworo. Mani p̀ó ble ke mà í mi gu dínlo,

⁹ zaakũ Dikiri p̀imene màsun p̀ó ble laro, màsun í mi laro, akũs̃ màsun era kũ zé kũ ma suooro.

¹⁰ Akũ à zé pãnde sè, adi zé kũ à sùo Beteli sé doro.

¹¹ Annabi zĩ ke kú Beteli gwe. Kũ a néno sù, ò yã kũ Luda gbẽ pìi kè gwe zĩ birea bàba n dené kũ yã kũ à ò ḱinaneeo pínki.

¹² Akũ n de n lá à pì: Zé kpaten à sèe? Akũ a néno zé kũ Luda gbẽ kũ à bò Yudanŋ b̀usun pìi sèe òne.

¹³ Akũ à p̀ĩne: À g̀ari ỳimene zaakine. Akũ ò ỳine ò a d̀i a kpe.

¹⁴ Kũ à p̀ete Luda gbẽ p̀iii, akũ à a lè vutena gbiri lí gbáru. Akũ à a là à pì: Luda gbẽ kũ à bò Yudanŋ

bùsumme n ũ yá? À wèa à pì: Makūme!

¹⁵ Akū annabi zī pìi pìne: Ì mós ò gé ma bea, ò pò ble.

¹⁶ À wèa à pì: Mani f̄s mà era mà tá kūnworō. Mani f̄s mà pò ble ke mà í mi kūnwo gu dínlo,

¹⁷ zaakū Dikiri pìmene màsun pò ble ke mà í mi laro, akūsō màsun tá kū zé kū ma suooro.

¹⁸ Akū annabi zī pìi pìne: Annabiin ma ũ lán n bà. Malaika ke mé à Dikiri yā òmene à pì mà pétenyī mà su kūnwo ma bea, de ò pò ble ò í mi. Ama éken annabii pì ten to.

¹⁹ Akū Luda gbē pìi èra kāao, à pò blè a bea à í mi.

²⁰ Goro kū ò vutena pòblei, Dikiri yā sù annabi zī kū à sù kāao pìia,

²¹ akū à wiki lè Luda gbē kū à bò Yudanō bùsun pìia à pì: Dikiri n Luda pì, lākū n gi a yā mai nà, ndi yā kū à ònne maro,

²² n era n su n pò blè n í mi gu kū à ònne òsun pò blenlo òsun í minlo pìi, oni n vī kū n dizinoro.

²³ A pòblena kū a íminaaoo gbera, annabi kū à sù kāao pìi gàarii yīne zaakia.

²⁴ Kū à dà zén, akū à kpākū kū músuu, akū músuu pì a dè. A gèe gò ditena zén, akū zaaki kū músuu gò zena a gèe pìii.

²⁵ Kū gbē kū òten gētenō a gèe è wutena zén gwe kū músu kū à zena a sareo, akū ò gèe ò a baaruu kpà wēte kū annabi zī pì kún.

²⁶ Kū annabi kū à sù kāao pì a baaruu mà, à pì: Luda gbē kū à gì Dikiri yā main gwe. Akū Dikiri a kpà músua, à a è'e à dè lākū Dikiri òne nà.

²⁷ Akū à pì a nénone: À gàari yīmene zaakine. Akū ò yīne.

28 À dà zén, akū à gèε à a gèε lè wutena, zaaki kū mūsuu zei. Mūsuu pì dí gèε pì sóro akūsō adi zaaki pì é'ero.

29 Akū annabii pìi Luda gbē pìi gèε sè à dì zaaki musu à sùo a bε wētεn, de à gè só dō à a vī.

30 Akū à a vī a zīda mirawεεn, à só dō à pì: Waiyoo ma gbē!

31 Kū à a vī à làka, à pì a nénε: Tó ma ga, à ma vī mirawεε kū ma Luda gbē pìi vīn à ó gè kpákūsū.

32 Zaakū yā kū Dikiri dāne à ò Beteli sa'oki musu kū tānakpe kū ò kú Samaria būsū wēte tānagbagbakianō ni ke yāpura.

33 Bee kū abireo Yeroboamu dí kpe li a yāvānikēnaanero, à èra à Isaraila buri sīnda pínki dìte tānagbagbaki sa'orinō ū dō. Gbē kū ò ye ò gō tānagbagbaki sa'orinō ūn à n kē a ū.

34 Durunna kū à tò ò Yeroboamu burinō dúgu zō ò làka andunia gūnn gwe.

14

Annabi Ahia yā kū ani Yeroboamu le onaa

1 Goro birea gyā Yeroboamu négōgbē Abia kū.

2 Akū Yeroboamu pì a nanε: Ñ fute ñ n zīda lite, de òsun n dō ma nō ūro, ñ gé Silo. Annabi Ahia kú gwe. Àkū mé à pìμεε manigō de Isarailanō kīna ū.

3 Ñ burodi sé mèn kuri kū kàranō kū zó tūruuo, ñ géonε. Ani yā kū ani né pì le onne.

4 Akū Yeroboamu nanō kè le, à fute à gèε Silo à gè Ahia bεa. Ahia wé dí gu e doro, zaakū à zī kū a wé gō dāadāa.

⁵ Dikiri gīnake à ò Ahiane kū Yeroboamu nanŋ né ten gyā ke, akū àten su à yā gbekamma. Ñ one lán dí bà lán dí bà, zaakū tó à sù, ani a zīda litenne gbē pānde ūme.

⁶ Kū Ahia a gèse kīnii mà, àten gē kpén, à pì: Ñ gē Yeroboamu nanŋ! Bóyain n n zīda líte lee? Yā pāsīn Luda pì mà onne.

⁷ Ñ gé ñ o Yeroboamune, Dikiri Isarailanŋ Luda pì, akāame a n se n gbēno té, a n ke a gbē Isarailanŋ don'arede ū.

⁸ A kpataa bò Dauda burinŋ ōī, akū a n kan, ama n de lán a zòbleri Dauda bàro, kū à a yāditenanŋ kūna, à téi kū nèsedoo à yā kū á yeii kè.

⁹ N yā vāni kè de gbē kū ò dōnne arenŋla, n ge n tānanŋ kè n zīdane, mò kū n kāsano, akū n kpe liare, n a pŋ fē.

¹⁰ Abire yāin áni ásarū zī n burinŋa, áni n gōgbēno kakate Isarailanŋ gūn zōno kū zīdadeno n pínki, áni té na n bea, lākū òdi té na zùgbōa nà ari à té kū à láka pínki.

¹¹ Gbēdanŋ ni n buri kū oni gaga wētēnno só, bāno ni n gbē kū oni gaga sēnno ble. Dikiri mé à ò le.

¹² Mōkōn sō nōgbē, ñ fute ñ tá be. Tó n gēsese pète wēte gūn gōno, né pì ni ga.

¹³ Isarailanŋ ni a gè ōo do ò a vī. Yeroboamu burinŋ té n pínki, àpiin oni vī ado, zaakū àkūme ado Dikiri Isarailanŋ Luda yā mana lèa Yeroboamu onn.

¹⁴ Dikiri ni kīna pānde dite a gbē Isarailanŋne. Àkū mé ani Yeroboamu burinŋ dede. Gbāra dí! Bōo? Leme, tera dí!

¹⁵ Dikiri ni gò tō Isarailanŋa, oni gō lán leba kū

àten yĩgã í gũn bà. Ani IsarailanƆ bote bùsu mana kũ à kpà n̄ dizinƆa dín à n̄ fákƆa Yuflati bara dire, kũ ò Asatore lí pètepete ò Dikiri pƆ fèone yāi.

16 Ani IsarailanƆ kpámma durunna kũ Yeroboamu kè à IsarailanƆ dà a kenan yāi.

17 Akũ Yeroboamu nanƆ fùte àten tá. Kũ à kà Tiza, kũ à gèsee zè kpélelea gũnƆ, akũ négƆgbè p̄i gā.

18 Ò a v̄i, akũ IsarailanƆ ƆƆ d̄ò n̄ pínki lákũ Dikiri ò a zòbleri annabi Ahia gāi nà.

19 Yeroboamu yā kparanƆn kú IsarailanƆ kínanƆ gĩayākena takadan, z̄i kũ à kànƆ kũ a kíkeyānƆ pínki.

20 Yeroboamu kí blè wè baro awεεplame. Kũ à gā, akũ a né Nadabu vùte a gēne ũ.

YudanƆ kína Reoboamu

21 Sulemanu né Reoboamume YudanƆ kína ũ. À kí blè a wè bupla awεεdodemme, akũ à kí blè Yurusalemu wè ḡero awεεpla, wēte kũ Dikiri sè Isaraila buri s̄inda pínki wētēnƆ té de a tó gō kúa. A da tón Naama, Am̄ni burime.

22 YudanƆ yā kũ Dikiri yeiro kè, ò a pƆ fène de n̄ dizinƆa n̄ pínki n̄ durunna kũ ò kè yāi.

23 Ò t̄anagbagbakinƆ b̄ò n̄ z̄idane s̄is̄i lei s̄inda pínki musu kũ lí z̄ók̄ s̄inda pínki gbáruo, ò gbènƆ kũ línƆ pètepeten.

24 Bee se t̄anagbagbaki karuanƆn kú IsarailanƆ bùsun ḡgbēnƆ kũ n̄gbēnƆ. Leme IsarailanƆ buri kũ Dikiri pēm̄mañnenƆ dà v̄aninƆ sète le pínki.

25 Kína Reoboamu kíblena wè s̄Ɔrode ḡunn Misila kína Sisaki sù à lète Yurusalemua.

26 À Dikiri Ɔn aruzekēnƆ kũ kínabe pónƆ nàkƆa à wura sēgbako kũ Sulemanu pìnƆ sète pínki.

27 Akū kína Reoboamu sēgbako pìnŋ gēne pì kū m̀gotēo à nà a be dogari don'arēdenŋne n̄ ǎ a be kpélelea.

28 Tó kína ten gé Dikiri ɔnn, dogarii pìnŋ dīgō sēgbako pìnŋ kūna. Tó ò era ò sù, òdi era ò kátē n̄ kpén.

29 Reoboamu yā kparanŋ kū yā kū à kènŋ pínki kú Yudanŋ kínanŋ g̃ayākēna takadan.

30 Reoboamu kú Yeroboamuo dīgō z̃i ká kú k̄so ɔrŋ s̄inda pínki.

31 Kū Reoboamu gà, ò a mira kpàkūsū kū a dizinŋ Dauda w̄eten. A da tón Naama, Am̄oni burime. Akū a né Abia vùte a gēne ũ.

15

Yudanŋ kína Abia

1 Nebati né Yeroboamu kíblena w̄è baro plansaride gūnn Abia ḡō Yudanŋ kína ũ

2 à kí blè Yurusalemu w̄è aakōme. A da tón Maaka, Abusalomu burime.

3 À durunna kū a de kènŋ kè pínki, adi a z̃ida kpá Dikiri a Ludaa lán a dizi Dauda bàro.

4 Ama Dauda yāin Dikiri a Luda tò a buri kí blè Yurusalemu, à a buri pìi d̄ite a gēne ũ à tò Yurusalemu gbāna lè.

5 Zaakū Dauda yā kú Dikiri yeii kè, adi gí yā kú Dikiri d̄itene mairo ari a w̄endi lén, tó adi ke yā kú à kè Iti buri Uriane baasiro.

6 Abia kú Yeroboamuo dīgō z̃i ká kú k̄so ari Abia w̄endi lén.

7 Abia yā kparanŋ kū yā kū à kènŋ pínki kú Yudanŋ kínanŋ g̃ayākēna takadan.

⁸ Kū à gà, ò a vî Dauda wēten, akū a né Asa vùte a gēne ũ.

YudanƆ kína Asa

⁹ IsarailanƆ kína Yeroboamu kíblena wè barode gūnn Asa gō YudanƆ kína ũ,

¹⁰ akū à kí blè Yurusalemu wè bupla awεedo. A dai tón Maaka, Abusalomu burimε.

¹¹ Kína Asa yā kū Dikiri yeii kè lán a dizi Dauda bà.

¹² À pè tănagbagbaki karuanƆa a būsun, akū à tãna kū a dizinƆ kènƆ kòte pínki.

¹³ Bee se à a dai Maaka bò kpatan, kū à Asatorε lí ginaa pète yāi. Kína Asa lí pìi zō à té nàa Kidironu guvuten.

¹⁴ À a zīda kpà Dikiria ari a wèndi lén, ama adi tănagbagbaki kū ò bònƆ gbororo.

¹⁵ À wura kū andurufuuo kū pó pānde kū akāa kū a deo dìte Dikiri pó ũnƆ sète à kàte Dikiri onn.

¹⁶ Asa kū IsarailanƆ kína Baasao dìgō zī ká kū kōo ari n kíblena lén.

¹⁷ Baasa mé à gèe à lète YudanƆ būsuaa, akū àten bīni bo à lika Ramai, de gbēke sún bo ke à gē YudanƆ kína Asa būsunlo yāi.

¹⁸ Akū Asa andurufu kū wura kū à gō Dikiri on laasinnƆ sète kū pó kū ò kú a be laasinnƆ, à nà a ibanƆne n ɔĩ, akū à n zī Damasuku, Siria būsua kína Benadada, TabirimƆ né, Eziō daikore kīnaa à pì:

¹⁹ Ò lédokōnƆ ke lākū ma de kū n deo kè nà yā. A andurufu kū wuraaon dí. N lédokōnƆ kū n vī kū IsarailanƆ kína Baasao gboro, de à gomala kū a zīkarinƆ.

20 Akū Benadada lédokɔ̃nɔ kè kū Asao à a zìkarinɔ gbàrɛ ò gèè ò lète Isaraila wētenɔ. Ò Iyon sɔ̃ kū Dāo kū Abeli Betemakao kū Genesareti guo kū Nafatali burinɔ guo dɔ pínki.

21 Kū Baasa a baaruu mà, akū à bīnibona Ramaii tò à tà Tiza.

22 Akū kína Asa kpàkpaa kè Yudanɔne ñ pínki, adi gbēke tè boro à pì, ò Rama gbènɔ kū lí kū Baasa ten bīni boonɔ sète. Akū à bīni bòo à lika Geba kū à kú Biliaminu burinɔ gui kū Mizipao.

23 Kína Asa yā kparanɔn kú Yudanɔ kínanɔ gīayākena takadan, a négɔgbēkeyānɔ kū yā kū à kènɔ pínki kū wēte bīni kū à bònɔ. Kū à zī kù, gyā a kù a gbálanɔ.

24 Kū à gà, ò a mira kpàkūsū kū a dizinɔ a dizi Dauda wēten, akū a né Yosafata vùte a gēne ũ.

Isarailanɔ kína Nadabu

25 Yudanɔ kína Asa kíblena wè plade gūnn Yeroboamu né Nadabu kè Isarailanɔ kína ũ à kí blè wè plame.

26 À yā kū Dikiri yeiro kè à zè kū yā kū a de kè à Isarailanɔ dà durunna gūnwɔ.

27 Ahia né Baasa, Isaka buri lé kpàkūsūi gɔrɔ kū àkū kū Isarailanɔ ten lika Filisitini wēte Gibetši, akū à a dè gwe.

28 À a dè Yudanɔ kína Asa kíblena wè aakɔde gūmmɛ, akū à vùte a gēne ũ.

29 Kū à nà kíblenaaa, akū à Yeroboamu burinɔ dèdɛ ñ pínki, adi ñ gbēke tóro, à ñ kákate lán Dikiri ò a zòbleri Ahia, Silo gbē gāi nà.

³⁰ Yǎ pìi kè le durunna kǔ Yeroboamu kè yǎi, kǔ à IsarailanƆ dà a kenan à Dikiri IsarailanƆ Luda pƆ fèonε.

³¹ Nadabu yǎ kparanƆ kǔ yǎ kǔ à kènƆ pínki kú IsarailanƆ kínanƆ gǎyǎkenanƆ takadan.

³² Kína Asa kǔ IsarailanƆ kína Baasao zǐi kà kǔ kƆo ari n̄ kíblena lémmε.

IsarailanƆ kína Baasa

³³ YudanƆ kína Asa kíblena wè aakƆde gǔnn Ahia né Baasa kè IsarailanƆ kína ũ. À kí blè Tiza wè baro awεεsiikƆ.

³⁴ À yǎ kǔ Dikiri yeiro kè à zè kǔ Yeroboamu yǎkenao kǔ durunna kǔ à IsarailanƆ dà a kenanwo.

16

¹ Dikiri yǎ sù Anani né Yehua, akǔ à yǎ ò Baasanε à pì:

² Ma n bo bùsutitin, ma n ke ma gbě IsarailanƆ don'arεde ũ, akǔ n ze kǔ Yeroboamu yǎkenao n ma gbě IsarailanƆ dà durunnakenan, akǔ n durunna pìnƆ ma pƆ fè.

³ MƆkƆn kǔ n burinƆ, mani á dúgu zƆmε sà. Mani ke n ɔnnε lákū ma kè Nebati né Yeroboamu ɔnnε nà.

⁴ GbédanƆ ni n gbě kǔ oni gaga wète gǔnnƆ só, bǎnƆ ni n gbě kǔ oni gaga sènnƆ ble.

⁵ Baasa yǎ kparanƆ, yǎ kǔ à kènƆ kǔ a négƆgběkeyǎnƆn kú IsarailanƆ kínanƆ gǎyǎkenanƆ takadan.

⁶ Kǔ Baasa gà, ò a v̄ Tiza, akǔ a né Ela vùte a gēne ũ.

⁷ Dikiri yā pìi ò Baasanε kũ a burinƆ annabi Yehu, Anani né gāi, yā vāni kũ à kè à Dikiri pƆ fèonε lākũ Yeroboamu burinƆ kè nà yāi kũ Yeroboamu buri kũ à n̄ kakatεnƆ yāo dƆ.

IsarailanƆ kína Ela

⁸ YudanƆ kína Asa kíblena wè baraasƆƆro awεedode gūnn Baasa né Ela kè IsarailanƆ kína ũ à vùte Tiza wè pla.

⁹ A ìbanƆ do Zimirime a sōgonƆ kpado gbě zōkō ũ, akũ à lé kpàkūsūi kũńwo. GƆƆ kũ í Ela kũ a begwari Aza kpén zaa Tiza,

¹⁰ akũ Zimiri gè à a dè Asa kíblena wè baraasƆƆro awεεplade gūn, akũ à vùte a gēne ũ.

¹¹ Kũ à kí blè gǔnƆ, akũ à Baasa burinƆ dède n̄ pínki, adi gōgbě ke tó a danenƆ ke a gbēnnanƆ téro.

¹² À Baasa buri pìnƆ kàkate n̄ pínki, lākũ Dikiri ò annabi Yehu gāi nà.

¹³ Baasa kũ a né Elao Dikiri IsarailanƆ Luda pƆ fène durunna kũ ò kè tāna pāpānƆ yā musu, akũ dƆ ò IsarailanƆ dà a kenan yāi.

¹⁴ Ela yā kparanƆ kũ yā kũ à kènƆ pínki kú IsarailanƆ kinanƆ gīayākεna takadan.

IsarailanƆ kína Zimiri

¹⁵ YudanƆ kína Asa kíblena wè baraasƆƆro awεεplade gūnn Zimiri kí blè Tiza gƆƆ suppla. GƆƆ birea Isaraila zìkarinƆ bùra kú Filisitini wète Gibetō sare.

¹⁶ Kũ zìkarii pìnƆ mà Zimiri lé kpàkūsū kũ gbēnƆ kínai à a dè, akũ ò n̄ don'arede Ōmiri kà IsarailanƆ kína ũ n̄ bùran gwe gǔnƆ.

17 Akū Ōmiri kū Isaraila zīkarinŋ fùtε Gibetō ò gèε ò līka Tizai.

18 Kū Zimiri è ò a wēte siawa, akū à didi à gè a be kpédidikōana musu gūn à té nàa, akū à té kū à gà

19 durunna kū à kè yāi. À yā kū Dikiri yeiro kè à zè kū Yeroboamu yākenaa. À durunna kè, akū dŋ à Isarailanŋ dà a kenan.

20 Zimiri yā kparanŋ kū lé kū à kpākūsū kūrwo Elaiio kú Isarailanŋ kīnanŋ gīayākena takadan.

Isarailanŋ kīna Ōmiri

21 Isarailanŋ kpàate leu pla. Ní kpadonŋ ye ò Ginati né Tibini ká kīna ũ, ní kpadonŋ sŋ, Ōmiri.

22 Kū gbē kū ò zè kū Ōmirionŋ gbāna de gbē kū ò zè kū Ginati né Tibinionŋla, akū ò Tibini dè, Ōmiri kí blè.

23 Yudanŋ kīna Asa kīblena wè baraakuri awεdode gūnn Ōmiri kè Isarailanŋ kīna ũ, à kí blè wè kuri awεepla. À kè Tiza wè suddo,

24 akū à Samaria sīsī lù Sema kū andurufuuo kiloo baaakō akuri, akū à wēte kàtea à tó kpàne Samaria kū Sema mé à sīsī pì vī yā yāi.

25 Ōmiri yā kū Dikiri yeiro kè à durunna kè de gbē kū ò dōne arenŋ pōla ní pínki.

26 À zè kū Nebati né Yeroboamu yākenaa pínki. À Dikiri Isarailanŋ Luda pŋ fène kū durunna kū à kè tana pāpānŋ yā musuo à Isarailanŋ dà a kenan dŋ.

27 Ōmiri yā kparanŋ kū yā kū à kènŋ kū a négōgbēkeyānŋn kú Isarailanŋ kīnanŋ gīayākena takadan.

28 Kū à gà, ò a vī Samaria, akū a né Ahabu vùte a gēne ũ.

Isarailanŋ kína Ahabu

²⁹ Yudanŋ kína Asa kíblena wè bupla plansaride gūnn Ōmiri né Ahabu kè Isarailanŋ kína ū à kí blè Samaria wè baro awεεplame.

³⁰ À yā kū Dikiri yeiro kè de gbē kū ò dōne arenŋ pōla n̄ pínki.

³¹ A zena kū Nebati né Yeroboamu durun-nakenaao dí kene yāke ūro, akū à Sidōdenŋ kína Etabaali nénégbē Yezebeli sè nŋ ū, akū à nà Baali tānagbagbanaaa, àdigō kútene.

³² À kpé bō Baaline Samaria, akū à a gbagbaki pète kpé pìi gūn.

³³ À Asera lí pèten dŋ à èra à Dikiri Isarailanŋ Luda pŋ fēne de Isarailanŋ kína kū ò dōne arenŋ pōla n̄ pínki.

³⁴ Ahabu gŋŋan Beteli gbē Iyeli Yeriko kèke à kàte. Kū à a bīni ē pète, akū a daudu Abiramu gà. Kū à a zé gbànŋ pète, akū a né kpede Segubu gà lākū Dikiri ò Nuni né Yŋsua gāi nà.

17

Kāakāannanŋ annabi Iliasu gwanaa

¹ Tisibe gbē Iliasu bō a bea Giliada būsun à gèe à Ahabu lè à pì: Kū Dikiri Isarailanŋ Luda kū maten doi kunnaao, zaa wēnla plí ni kpáro, legū ni maro, séde gŋŋ kū ma ò baasiro.

² Akū Dikiri yā sù Iliasua à pì:

³ N̄ fute n̄ gé ifāboki kpa, n̄ ute Keriti swawεen Yoda bara dire kpa.

⁴ Īnigō swa pì í mi. Ma dìte kāakāannanŋne ògō n̄ gwa gwe.

5 Akū à gèε à kè lákū Dikiri òare nà, à vùte Keriti swawεen Yoda bara dire kpa.

6 Kāakāannanŋ òigŋ sunε kū burodiiio kū nòbŋŋŋŋ kŋnkŋ kū ɔkŋsio, akū à òigŋ swa pì í mi.

Zarefa gyaanŋ Iliasu gwanaa

7 Gŋŋŋ pla gbera swa pì í bàba kū legū dí ma bùsuu pìnlo yāi.

8 Akū Dikiri yā sùà à pì:

9 Ñ fute ñ gé Zarefa Sidŋ bùsun, ñgŋ kú gwe. Ma gyaanŋ ke òite àgŋ n gwa gwe.

10 Akū à fùte àten gé Zarefa. Kū à kà wēte pìi sare, à gyaanŋ ke lè, àten yàka wε gwe. Akū Iliasu lé zù gyaanŋ pìi à pì: Ñ gé ñ sumεne kū ío, bee fíti, mà mi.

11 Kū àten gé tŋ, Iliasu èra à lé zù à pì: Ñ sumεne kū burodi kusuo ò.

12 Akū nŋgbē pìi pìne: Kū Dikiri n Luda kunnaao, bee burodi má vīro, séde wísiti okū ò kū à gŋŋ gbaka gūn kū nísio fíti tūruu gūn baasiro. A yàkaan maten wε la, de mà tá be mà pŋble keo, ò ble kū ma néo ògŋ ga dā.

13 Akū Iliasu pìne: Ñsun tó vīna n kūro. Ñ gé ñ ke lákū n ò nà, ama ñ burodi keo fíti ñ suomenε gīa, gbasa ñ n pŋ ke kū n néo.

14 Zaakū Dikiri Isarailanŋ Luda pì, wísiti ni láka gbaka pìi gūnlo, akūsŋ nísi ni láka tūruu pìi gūnlo ari gŋŋŋ kū ani tó legū ma bùsuu pìn.

15 Gyaanŋ pìi gèε à kè lákū Iliasu òare nà, akū pŋble mŋmā ari gŋŋŋ ūgbangba, àpìi kū a bedenŋ kū Iliasuo.

16 Wísiti dí láka gbaka pìnlo, akūsŋ nísi dí láka tūruu pìnlo, lákū Dikiri ò Iliasu gāi nà.

17 Abire gbera nɔgbē bede pì né ten gyã ke. Kū gyã gbāna kpà manamana, akū a wëndii bò.

18 Akū nɔgbē pìi pì Iliasune: Luda gbē, bó mé à ó ká kũ n su ma kīnaaa? N su ma durunna dɔ Ludagu de à ma né de yāin yá?

19 Akū Iiasu pìne: Ñ n né pì kpáma. Akū à né pìi sì nɔgbē pì ɔ̄ à dīdi kāao kpé musu gu kũ à kīpan. À a wùte a gádoa gwe,

20 akū à ɔ̄ dɔ Dikirine à pì: Dikiri ma Luda, mɔkɔn mé n tò gyaano kũ ma kipa a bea né gà n pɔsira kpài yá?

21 Akū à wùte à a zīda pòro négɔgbē pila gēn aakɔ à ɔ̄ dɔ Dikirine à pì: Dikiri ma Luda, ñ tó a wëndi era à su a mēe gūn.

22 Dikiri Iiasu ɔ̄ dɔ mà, akū wëndii èra à sù né pìia à fùte.

23 Kū Iiasu négɔgbē pìi sè à kīpa kāao, à gè kāao kpén, akū à a kpà a daa à pì: Ñ gwa, n né pìi wëndii sù!

24 Akū nɔgbē pìi pì Iliasune: Má dɔ sà kũ Luda gbēme n ũ. Dikiri yā kũ à bò n lén bi yāpurame.

18

Iiasu kũ Obadio

1 À gɔrɔ pla kè, akū Dikiri yā sù Iiasua legūmanasari wè aakɔde gūn à pì: Ñ gé ñ n zīda mɔ Ahabune, mani tó legū ma a būsun.

2 Akū Iiasu fùte àten gé a zīda mɔ Ahabune.

Kū nàa kè gbāna Samaria,

3 akū Ahabu a begwari Obadia sīsì. Obadia pìi sɔ̄ à Dikiri vīna vī manamana.

4 Gɔrɔ kũ Yezɛbeli ten Dikiri annabinɔ dɛdɛ yā, akũ Obadia n̄ gbɛ kenɔ sɛtɛ gbɛnɔn basɔɔro à n̄ úte gbɛwɛɛnɔ gũn gbɛnɔn bupla akurikuri, akũ à n̄ gwá kũ póbleo kũ ío.

5 Akũ Ahabu pì Obadianɛ: Ò dodo gunɔi ò gé ísɛbokinɔ kũ swawɛɛnɔn pínki. Òdigɔ dɔro ke óni sɛ̀ le ò kpá ó sɔnɔa kũ ó baragbásɔnɔ.

6 Akũ ò gu kpàate, n̄ baadi a zé sè.

7 Kũ Obadia tena, akũ ò kpàkũ kũ Iliasuo. À a dɔ̀, akũ à wùtɛ a n̄sɛlɛ kutena à pì: Ma dikiri Iliasu, mɔkɔmmen gwe yá?

8 Iliasu wèa à pì: Makũmɛ! N̄ gé o n dikiriinɛ má kú la.

9 Akũ Obadia pì: Bó taarin ma kè, kũ nten makũ n zòbleri na Ahabunɛ a ɔ́i à ma dɛɛ?

10 Ma sì kũ Dikiri n Ludao buri ke bùsu ke kun kũ ma dikiri gĩ gbɛnɔ zírĩma ò n wɛtenyĩro. Tó ò pì n̄ kũ gwero, àdi tó ò la damɛ.

11 Akũ nten omɛnɛ dɔ̀ mà gé mà o ma dikiri Ahabunɛ kũ n̄ kú la yá?

12 Tó ma da zén, manigɔ dɔ̀ gu kũ Dikiri Nini ni n sé à tá kũnworɔ. Tó ma gɛ ma ò Ahabunɛ, tó à sù adi n ero, ani ma demɛ. Makũ n zòbleri sɔ́ má Dikiri vĩna vĩ zaa ma kefennakɛgɔɔa.

13 Ma dikiri Iliasu, kũ Yezɛbeli ten Dikiri annabinɔ dɛdɛ, n̄di yā kũ ma kè maroo? Makũ mé ma n̄ gbɛkenɔ sɛtɛ gbɛnɔn basɔɔro, ma n̄ úte gbɛwɛɛnɔ gũn gbɛnɔn bupla akurikuri, ma n̄ gwá kũ póbleo kũ ío.

14 Akũ n pìmɛnɛ dɔ̀ mà gé mà o ma dikiri Ahabunɛ n̄ kú la yá? Ani ma demɛ.

15 Akũ Iliasu pì: Ma sì kũ Dikiri Zĩkaride kũ

maten doiio, mani ma zĩda mɔne gb̃ara sà.

Iliasu kũ Baali t̃anagbagbarinɔ Kaameli kpi musu

¹⁶ Akũ Obadia g̃eε à dà Ahabulε à yā pii òne, akũ Ahabu g̃eε da Iliasulε.

¹⁷ Kũ Ahabu Iliasu è, à p̃ine: Isarailanɔ b̃usuderi, mɔkɔmmen gwe yá?

¹⁸ Akũ Iliasu pi: Adi ke makũ mé ma Isarailanɔ b̃usuu d̃ero, mɔkɔn kũ n de bedenɔ ákɔnɔ mé a d̃e, zaakũ a p̃a kp̃a Dikiri ỹaditenanɔi a te Baalii.

¹⁹ Ñ Isarailanɔ sísi n̄ p̃ínki, ò dakare Kaameli kpi musu l̃eεε kũ Baali t̃anagbagbari gb̃enɔn w̃aa pla kũ bupla akurio kũ Asera t̃anade gb̃enɔn w̃aa pla kũ òdi p̃o ble kũ Yezebelionɔ.

²⁰ Ahabu Isarailanɔ sísi n̄ p̃ínki, akũ à t̃anade p̃inɔ kàkara Kaameli kpi musu.

²¹ Akũ Iliasu nà gb̃enɔi à n̄ lá à p̃i: Á laasun nig̃ɔ kpaatena ari b̃oremeε? Tó Dikiri bi Ludame, à t̃éi. Tó Baalime s̃ɔ, à t̃éi. Odi ỹake wearo,

²² akũ Iliasu p̃in̄ne: Dikiri annabinɔ t̃e makũ mé ma g̃ɔ mado. Baali t̃anagbagbarinɔ s̃ɔ, gb̃enɔn w̃aa pla kũ bupla akuriome.

²³ À z̃usanɔ kp̃awá m̃en pla, t̃anade p̃inɔ à m̃en do sé ò z̃ɔz̃k̃ɔre ò ká ỹakala, òsun t̃e naaro. Makũ se mani a do keke mà ká ỹakala, mani t̃e naa sero.

²⁴ M̃ókɔnɔ s̃ɔ ò Baali sísi, makũ s̃ɔ mani Dikiri sísi. N̄ gb̃e kũ à mà, akũ à s̃u kũ t̃éo, àk̃ume Luda ũ. Akũ gb̃e s̃inda p̃ínki pi: Yā maname!

²⁵ Akũ Iliasu pi t̃anade p̃in̄ne: À z̃usa m̃en do sé à keke káaku, zaakũ ákɔnɔ mé á dasi. À á t̃ana sísi, ama àsun t̃e naaro.

²⁶ Akū ò zùsa kū ò kpàmma sì ò kèkè, akū òten Baali sísi zaa kónko ari ifántē gèe káo m̀dangura. Òten ũ wā, òten lika sa'oki kū ò b̀oi, òten pi: Baali, òn yā mawá! Bee kū abireo odi yāke maro, adi yā mańmaro.

²⁷ Kū ifántē kà m̀dangura, akū Iliasu teni n̄ lalandi ke à pì: À wiki lé gbāna à kara, àkūme dikiri ũroo? Ke a laasun tà kpadome. Ke à gèe b̄nikpe keme. Ke à gèe w̄teamε. Ke àten i omε, akū ádi a vuroo?

²⁸ Akū òten wiki lé kū k̀to gbānao, òteni n̄ z̄ida líli kū f̄nedao kū sário lákū òdi ke nà, ari aru ten pla n̄ m̀εa.

²⁹ Kū ifántē gò m̀ia, akū òten yā ya ari sa ɔkosi ogoro gèe à kào. Bee kū abireo adi yāke weńmaro, adi yā mańmaro, adi s̄a kpányĩro.

³⁰ Akū Iliasu pì parine: À namai la! Kū ò nài n̄ pínki, akū à Dikiri gbagbaki kū à gb̀roo kèkè àten bo.

³¹ À gb̀ε s̀ε m̀en kuri awεεpla Yakubu burino dasi lén. Yakubun Dikiri yā òne yā à pì òḡ pine sà Isaraila.

³² Kū à Dikiri gbagbaki pìi b̀o, akū à ẁεε ỳ à likai. Ẁεεε pìi kà à í sí lita ḡero.

³³ À yàkaa kà sa'oki pìla, à z̀u pìi z̀z̀k̄re à kà yàkaa pìia à pì: À í t̄o lo siik̄, à ká sa'opo pìia kū yàkaa pìio.

³⁴ Kū ò t̀, akū à pì: À era à t̄o do. Kū ò t̀, akū à pì: À era à t̄o à ke g̀en aak̄. Akū ò t̀ ari g̀en aak̄.

³⁵ Í pìi bàa lè à lika sa'oki pìi ari ẁεεε pìi pà.

³⁶ Sa ɔkosi ogoro akū annabi Iliasu nài à pì: Dikiri, Ibrahĩ kū Isaakuo kū Isarailao Luda, ò t̄o ò d̄o

gbāra kŭ məkōmmε Isarailanŏ Luda ũ akūsŏ n zòbleriime ma ũ, maten yā dí ke kŭ məkŏn mé n ma dan yāi.

³⁷ N̄ yā mama Dikiri! N̄ yā mama, de gbē dínŏ le ò dŏ kŭ Dikiri, məkōmmε n̄ Luda ũ akūsŏ n̄teni n̄ n̄εε litéínε de ò era ò summa.

³⁸ Akŭ Dikiri té sù sa'obŏŏ p̄ia kŭ yàkaao kŭ gbènŏ kŭ bŭsuuo, ò té kŭ, akŭ í kŭ à kú w̄εε p̄in bàba.

³⁹ Kŭ gbēnŏ è, akŭ ò wùte n̄ n̄εεε kutena ò p̄i: Dikirime Luda ũ! Dikirime Luda ũ!

⁴⁰ Akŭ Iliasu dànnε à p̄i: À Baali t̄anagbagbarii p̄inŏ kŭkŭ, n̄ gbēke sún p̄itiáwaro. Kŭ ò n̄ kŭkŭ, akŭ Iliasu ḡεε kŭn̄wo Kisŏ guvuten à n̄ d̄εε gwe.

⁴¹ Iliasu p̄i Ahabunε: N̄ gé p̄o ble n̄ í mi, zaakŭ ma legŭ k̄inii mà dŏ.

⁴² Akŭ Ahabu ḡεε p̄o ble à í mi. Akŭ Iliasu didi à ḡεε Kaameli mìs̄n̄tea à vùte à mìi kà tún.

⁴³ À p̄i a z̄ikeriine: N̄ gé gu gwa ísira kpa. Akŭ à ḡεε à gwà. Kŭ à sù à p̄i: P̄óke kú gwero. Akŭ Iliasu p̄ine à era à gé gwa dŏ, akŭ à ḡεε le ari ḡen suppla.

⁴⁴ A ḡen suppladeo z̄ikerii p̄i p̄i: Ma legŭ è lokona serεε lán òla bà, àten fute ísira musu. Akŭ Iliasu p̄ine: N̄ gé n̄ o Ahabunε à s̄go dŏ s̄n̄ŏa à ḡen à kipa k̄pia ari legŭ ḡŏ gé a d̄ādā.

⁴⁵ Legŭ ten sísi busebuse, z̄aga'ía fùte, akŭ legŭ mà manamana. Ahabu kú s̄gon, àten tá Yεzerili.

⁴⁶ Dikiri gbāna sù Iliasua, akŭ à a uta z̄ŏkŏŏ kàkara à kŭ, à bàa lè à Ahabu k̄e ari à ḡεε káo Yεzerili.

19

Dikiri yā'ona kŭ Iliasuo Orɛbu

¹ Akū Ahabu yā kū Iliasu kèe bàba Yezebeline pínki, lákū à tãnade pìnŋ dèdè nà kū fēnedao ní pínki.

² Akū Yezebeli légbāzā kè Iliasunε à pì: Ari zia mandara'i, tó mádi kenne lákū n kè tãnadenŋne nàro, tãnanŋ yā kemene pāsīpāsī!

³ Akū vīna Iliasu kù, akū à fùte à bàa sì à a zīda miboki wète. Kū à kà Beseba, Yudanŋ būsun, gwen à a zīkerii tòn,

⁴ akū à tãa ò gbárannan gŋŋ do. À gèe à wùte sē lí gbáru, akū à adua kè à le à ga à pì: Dikiri, yā díkīna mōma le. Ñ ma wèndi sé gōnŋ, zaakū má de ma dizinŋlaro.

⁵ Akū à wùte àten i o sē lí pì gbáru.

Kánto malaikaa sù à ŋ kèa à pì: Ñ fute ñ pò ble.

⁶ Kū Iliasu gu gwà, akū à kàra asāna è kū í tūruuo katena a mīi. Akū à pò blè à í mì à èra à wùte.

⁷ Dikiri Malaikaa èra à sù a gèñ pladeo, à ŋ kèa à pì: Ñ fute ñ pò ble, zaakū tá gbānan nten su o.

⁸ Akū à fùte à pò blè à í mì. Pòble pì tò à gbāna lè, akū à tãa ò gŋŋ bupla fānantē kū gwāanio ari à gèe à kà Luda kpi kū òdi pì Oredua.

⁹ Akū à gè gbèwēen à ì gwe, akū Dikiri yā sùà à pì: Iliasu, bón nten ke laa?

¹⁰ À wèa à pì: Dikiri Luda Zīkaride, ma laakarīi fùte manamana, zaakū Isarailanŋ pā kpà n bàka kunna kūñwo yāi, akū ò n gbagbakinŋ gbòro ò n annabinŋ dèdè kū fēnedao. Makū mé ma gō mado, akū òteni ma we se.

¹¹ Akū Dikiri pì: Ñ bo ñ gé ze ma are kpi musu, mani gète n are.

Zàga'īa gbāna fùte, àten kpi pìnŋ para àten gbènŋ wíwi Dikiri are, ama Dikiri kú īa pì gūnlo. īa pì

gbera zĩte yĩgāyĩgā, ama Dikiri kú zĩte yĩgāyĩgānaa pìi gūnlo.

¹² Zĩte yĩgānaa pìi gbera akū té bò, ama Dikiri kú té pìi gūnlo. Té pìi gbera akū kòto busεεε bò τεεεε.

¹³ Kū Iliasu kòtoo pìi mà, à a uta zōkō kù a wéa. Akū à bò à gèε à zè gbèwεεε pì léa, à mà ò pìare: Iliasu, bón nten ke laa?

¹⁴ À wèa à pì: Dikiri Luda Zĩkaride, ma laakarìi fùte manamana, zaakū Isarailanŋ pā kpà n bàka kunna kúnwo yāi, akū ò n gbagbakinŋ gbòro ò n annabinŋ dèdε kū fēnεdao. Makū mé ma gō mado, akū òteni ma wε se.

¹⁵ Akū Dikiri pìne: Ì era ò tá Damasuku gbárannan. Tó n ka gwe, ò Azaili ká Siria kína ũ,

¹⁶ ò Nimisi daikore Yehu ká Isarailanŋ kína ũ, ò Abeli Mεola gbē Safata né Elisa ke n gēne ũ annabi ũ.

¹⁷ Gbē kū bò Azaili fēnεda léi, Yehu mé ani a dε. Tó à bò Yehu fēnεda léi sō, Elisa mé ani a dε.

¹⁸ Bee kū abireo má Isarailanŋ kūna gbēnŋn dúbu suppla, kū ò gbēke dí kúte Baaline à lé pèaro.

Elisa sisinaa

¹⁹ Akū Iliasu fùte à bò gwe à gèε à Safata né Elisa lè, àten bú wí kú zùnŋ swa kuri awεεpla. Àkū mé à té zù swa kpεdei. Akū Iliasu nài à a gyabaa gò à dàala.

²⁰ Akū Elisa a zùnŋ tò gwe à bàa lè à bò à té Iliasu kpε, akū à pìne: Ì tó mà gé lé za ma de kū ma daoaa gīa, gbasa mà su mà tényĩ sà. Akū Iliasu pìne: Ì gé ò era ò su. Ì dō yā kū ma kènne.

²¹ Akū Elisa èra à gèε à a zùnŋ kùtu kpà à té kà kū a zù swa gbāngoo, akū à zùu pìnŋ nòbŋŋ fùfuu kè à kpà gbēnŋa ò sò. Akū à bò à tè Iliasui, à gò a plade ũ.

20

Benadada kũ a zĩkarinŏ likana Samariai

¹ Siria kĩna Benadada a zĩkarinŏ kàkara nĩ pĩnki. Kĩna gbẽnŏn baraakuri awɛɛplanŏn kũ kãao kũ nĩ sŏnŏ kũ nĩ sŏgonŏ. Akũ ò gèè ò lika Samariai ò lètɛa.

² Akũ à gbẽnŏ zĩ Ahabua wètɛ gũn à pì: Makũ Benadada ma pì,

³ n andurufu kũ n wuraaŏ gò ma pò ũ. N nŏ mananŏ kũ n né mananŏ gò ma pò ũ dŏ.

⁴ Akũ Isarailanŏ kĩna pì: Ma dikiri kĩna, makũ kũ pò kũ má vĩnŏ gò n pò ũ pĩnki lákũ n ò nà.

⁵ Akũ Benadada èra à gbẽnŏ zĩa dŏ à pì: Makũ Benadada ma gbẽnŏ zĩ ma n andurufu kũ n wuraaŏ kũ n nŏnŏ kũ n nénŏ làmma.

⁶ Zia mandara'i mani ma gbẽnŏ zĩmma ò n bɛ kpukɛ kũ n gbẽnŏ benŏ, oni á pò bèèrɛdenŏ sɛtɛ ò suomenɛ pĩnki.

⁷ Akũ Isarailanŏ kĩna a bùsu gbẽ zŏkŏnŏ sisi nĩ pĩnki à pìnnɛ: A è lákũ àtɛni ó lé wɛtɛ nà yá? Kũ à gbẽnŏ zĩma, à ma nŏnŏ kũ ma nénŏ kũ ma andurufuuo kũ ma wuraaŏ làma, mádi gíonero.

⁸ Akũ gbẽ zŏkŏ pìnŏ kũ gbẽ kparanŏ pìnɛ: N̄sun a yá maro, n̄sun wɛnɛro.

⁹ Akũ à pì Benadada zĩrinŏnɛ: À gé à o ma dikiri kĩnanɛ, pò kũ à là makũ a zòbleriia káakun mani kɛ. Pò kũ à làma kpɛkpɛ dín mani kɛro. Akũ zĩrii pìnŏ èra Benadadanɛ kũ légbāzā pìio.

¹⁰ Akũ à èra à gbẽnŏ zĩ Ahabua dŏ à pì: Tó Samaria bùsutiti gò à kà kũ ma gbẽnŏ le à dādā okũ dodo, tãnanŏ yá kɛmɛnɛ pāsĩpāsĩ!

11 Akū Isarailanŋ kína pì: À gé à onε, gbē kū àten zìka'uta da sún ãa dā lākū gbē kū à uta pìi bò à kàte bàro.

12 Kū Benadada yā pìi mà ɔɔɔ kū àten í mi kū a kína dakenŋ n̄ bizakutanŋ ɔ̀n, akū à pì a gbēnŋnε ò soru κε. Akū ò gèε soru κε.

Ahabu zìblena Benadadaa

13 Annabi ke sù à Isarailanŋ kína Ahabu lè à pìne: Dikiri pì, n zìkari dasinŋ è gwe yá? Áni n̄ nannε n ɔ̀i gbāra, ãnigŋ dŋ kū akāame Dikiri ũ.

14 Akū Ahabu a là à pì: Dí mé ani abire κεε? À wèa à pì: Dikiri pì, n bùsu gu gbē zŋkŋnŋ kefenna zìkarinŋ mé oni κε. Akū Ahabu a là dɔ: Dí mé ani na zìia káaku? À wèa à pì: Mɔkŋmmε!

15 Akū Ahabu gu gbē zŋkŋnŋ kefenna zìkarii pìnŋ kàkara gbēnŋn wāa do kū baraakuri awεεplao. Akū à a zìkarinŋ kàkara n̄ pínki, ò kè gbēnŋn dúbu suppla.

16 Ò fùte wēten ifāntē kà m̀dangura, ɔɔɔ kū í ten Benadada kū a kína dake pìnŋ de n̄ bizakutanŋ ɔ̀n.

17 Akū gu gbē zŋkŋnŋ kefenna zìkarii pìnŋ b̀te káaku. Akū Benadada zìrinŋ gèε ò ònε, gbēnŋ ten bo Samaria.

18 Akū Benadada pì: Tó aafian òten sun yoo ke kū zìio, à n̄ kūkū bēnε.

19 Kū gu gbē zŋkŋnŋ kefenna pìnŋ bò wēten, zìkarinŋn té n̄ kpé,

20 akū n̄ baadi a ibεεε dè. Kū Sirianŋ lèkŋa, akū Isarailanŋ pèr̀mma, akū Siria kína Benadada kū a sŋde kenŋ bàa sì ò n̄ kē sŋ muŋu.

21 Akū Isarailanŋ kína bò à gèε à sŋdenŋ kū sŋgodenŋ dèdε à Sirianŋ ásarū kè manamana.

22 Annabi pìi èra à sù à IsarailanƆ kína lè à pì: Ñ n zìkarinƆ kara ñgõ kú soru gūn, zaakū tó Sètāgɔɔ kà, Siria kína ni era à su létemma dɔ.

23 Akū Siria kína ìbanƆ pìnɛ: Isaraila tānanƆ bi sīsī tānanƆmɛ. Abire yāin n gbāna deóla. Tó óten zì ká kūnwo gusaran, ó gbāna nigõ deñla.

24 Ñ n kína dakenƆ lilin ke, n don'arede pāndenƆ ditedite n gbèn.

25 Séde n zìkarinƆ kū n sōnƆ kū n sōgonƆ gõ dasi lán káakupƆ kū n kurainƆ bà, ó zì ká kūnwo gusaran, ó gbāna ni deñla. Kína n yā mà, akū à kè le.

26 Kū Sètāgɔɔ kà, Benadada SirianƆ kākara, akū à gèe zì ká kū IsarailanƆ zaa Afeki.

27 Ò IsarailanƆ kākara ò kusuna kèñne, akū ò gèéñyī. SirianƆ dāgula gu sīnda pínki, akū IsarailanƆ buraa kàte lán blè kpàsa fítinna leu planƆ bà, ò are dòkōa.

28 Akū Luda gbē pìi sù à pì IsarailanƆ kínane: Dikiri pì, zaakū SirianƆ ten da sīsīnƆ dikirin a ũ, guvute dikirin a ũro, áni a zìkari dasi dīkīnanƆ nannɛ n ɔī, ñigõ dõ kū akāame Dikiri ũ.

29 Ñ buraƆ are dɔdɔkōana le ari gɔɔ suppla, a gɔɔ supplade pìn ò nà zīia. Akū IsarailanƆ Siria gèsedenƆ dède gbēnƆn dúbu basɔɔro zī pīa.

30 Kū gbē kparanƆ lèkōa ò sī Afeki wēten, akū a bīni lète à sīmma. Gbē pìnƆ kà gbēnƆn dúbu baraasɔɔro awesuppla. Benadada sō à bà sī à sī wēte pìn se, à gèe à ùte kpéne gūn.

31 Akū a ìbanƆ pìnɛ: O mà IsarailanƆ kīnanƆn gbēke vī. Ò uta kasanƆ dɔ ó pi, ò bà dɔ ó wakale, ò bo ò gé ò a le. Òdigõ dōro ke ani n tó kū wèndiio.

³² Akū ò uta kasanƆ dò ní pi, ò bàa dò ní wakale, ò gèe ò IsarailanƆ kína lè ò pì: N zòbleri Benadada pì ò a tó kū wèndiio. Akū IsarailanƆ kína pì: Ase à kpé kun yá? Ma gbēme.

³³ Yā pì kè gbē pìnƆne àlesi mana ũ, akū ò yā pì dà ò kù ò pì: Ee, Benadada bi n gbēme. Akū kína pì: À gé à a sé à su kāao. Kū Benadada sù, akū Ahabu pìne à gē kāao a sōgon.

³⁴ Akū Benadada pìne: Wēte kū ma de sì n deano mani era mà kpámma, ñigō laga yía Damasuku lākū ma de kè nà Samaria. Akū Ahabu pì: Ò lédokōnƆ ke abire musu, má n gbarɛ. Akū à lédokōnƆ kè kāao à a gbàre.

Annabi yādana kína Ahabula

³⁵ Dikiri pì annabi gā gbēkene à o a gbēdakenɛ à a lé. Kū annabii pì òne, akū à gì.

³⁶ Akū à pìne: Zaakū ñdi Dikiri yā maro, tó o kēkōa gōnƆ, músu ni n demɛ. Kū ò kēkōa, akū músu a è à dè.

³⁷ Annabii pì gbēke lè do, akū à pìne à a lé. Akū à a lè à kīna.

³⁸ Akū annabii pì biza kù a wéa à a zīda lite, akū à gèe àten kína dā zé léa.

³⁹ Kū kína ten gēte, akū annabii pì lé zùì à pì: Makū n zòbleri, kū ma ge zīlan, akū gbēke sù ma kīnaa kū gōgbē keo, à pì màoƆ a dākpā. Tó ma tò à pītima, ma wèndi lén gwe, kesō mani fīna bo kū andurufuuo kiloo bupla sōrosari.

⁴⁰ Kū ma laakarīi tà gu pāndea, akū gōgbē pì gēte. Akū IsarailanƆ kína pìne: Lākū oni wé tām̄ma nān n ò gwe.

41 À biza pìi gò a wéa likalika, akū IsarailanƆ kína a dɔ̀ annabi ũ.

42 Akū annabii pìi pìne: Dikiri pì, zaakū n gɔ̀gbɛ kū a d̄ite à ga gbàre, ïni ga a gēne ũ, n gbēnƆ ni gaga a gbēnƆ gēne ũ.

43 Akū IsarailanƆ kína dà zén à tà a bea zaa Samaria. A nèsee yàka à ānn s̄isi.

21

Naboti geepi líkpe

1 Abire gbera Yezerili gbēke kun, a tón Naboti. À geepi líkpe v̄i gwe Samaria kína Ahabu be sare.

2 Akū Ahabu pìne: Ñ n geepi líkpe kpáma mà ke dò kara ũ, zaakū à kú ma be sare. Mani geepi líkpe kū à mana de abirela kpámma a gēne ũ. Tó ní yei, mani f̄ina bonne kū andurufuuo láku à kù nà.

3 Akū Naboti pì Ahabune: Kai, ani sí kero! Mani f̄o mà túbi kū ma dizinƆ tòmene kpámmaro.

4 Akū Ahabu nèsee yàka, à tà be kū p̄sirao kū Yezerili gbē Naboti pìne áni túbi kū a dizinƆ tòare kpáaro yāi. Akū à w̄ute a gádoa à are dò gb̄iia à ḡi p̄ó blei.

5 A nanƆ Yezebeli sù à a là à p̄i: Bó mé à n le n ānn s̄isi, nídi p̄ó bleroo?

6 Akū à w̄ea à p̄i: Ma p̄i Yezerili gbē Nabotine à a geepi líkpe kpáma, mani f̄ina bone kū andurufuuo. Tó geepi líkpe pānden à yei s̄o, mani kpáa a gēne ũ. Akū à p̄i áni kpámaro.

7 Akū a nanƆ Yezebeli pìne: M̄ok̄n IsarailanƆ kí'ina yākenan dí yá? Ñ fute ñ p̄ó ble kū p̄onnao, mani Yezerili gbē Naboti geepi líkpe sínne.

8 Akū à takadanƆ kèkē kū Ahabu tóo à a tambari læa, à kpàzākpāzā gbē zōkōnƆ kū kine kū ò kú Naboti wēte gūnnone.

9 Takada pìnƆ gūn à pì: À léyĩgɔɔ dite à a kpàkpa ke. À vuteki mana kpá Nabotia gbēnƆ té

10 à gbē ginanƆ wete gbēnƆn pla à ní káte a are, de ò yā dia ò pì à Luda kū kínao tó vāni sì. À a kū à bo kāao wēte kpe, á a pápa kū gbèeo à de.

11 Akū Naboti wēte gbē zōkōnƆ kū kinenƆ kè lákū Yezebeli ò takada kū à kpàzānnenƆ gūn nà.

12 Ò léyĩgɔɔ dite, akū ò vuteki mana kpà Nabotia gbēnƆ té.

13 Akū gbē gina gbēnƆn pla pìnƆ sù ò vùte a are, ò yā dia gbēnƆ wára ò pì à Luda kū kínao tó vāni sì. Akū ò a kù ò bò kāao wēte kpe ò a pápa kū gbèeo ò dè.

14 Akū ò légbāzā kè Yezebeline ò pì, ò Naboti pápa kū gbèeo ò dè.

15 Kū Yezebeli mà ò Naboti pápa kū gbèeo ò dè, akū à gèe à pì Ahabune: Ñ fute ò gé Naboti geepi líkpe kū à gionne pì sí n pó ũ, zaakū à kun doró à gà.

16 Kū Ahabu mà Naboti gà, akū à fute àten gé de à a geepi líkpe sí a pó ũ.

17 Akū Dikiri yā sù Tisibe gbē Iliasua à pì:

18 Ñ fute ò gé Samaria kína Ahabu le. À gèe Naboti geepi líkpe sí, à kú gwe.

19 Ñ onè makū Dikiri ma pì, à gbē dè à sù a túbi sín gweroo? Ñ onè dɔ, gu kū gbēdanƆ Naboti aru sāsān, gwen oni àpii pó sāsān se.

20 Kū Ahabu Iiasu è à pì: Ma ibere, ari tera nídi ma tóroo? Akū Iiasu pìne: Ee, mádi n tóro, zaakū n

n zĩda dà yā kũ à vāni Dikirine kenan.

²¹ Akũ Dikiri pì áni sunyĩ zĩmma áni n burino kakate, n gōgbē ke ni gō Isarailano bũsunlo, bee zĩdade kesō zò.

²² Áni ke n onne lākũ à kè Nebati né Yeroboamu onne nà, lākũ à kè Ahia né Baasa onne nà, zaakũ n Isarailano dà durunnakenan n a pō fēne.

²³ Yezebeli sō, Dikiri pì gbēdanō ni a só Yezirili bĩni sare.

²⁴ Gbēdanō ni n gbē kũ oni gaga wēte gūnnō só, bānō ni n gbē kũ oni gaga sēnnō ble.

²⁵ Gbēke kun ziki kũ à a zĩda dà yā kũ Dikiri yeiro kenan lán Ahabu bàro, akūsō a nanō Yezebeli dì té káagu.

²⁶ À yā kũ ò a tēnō kè manamana, à tè tānanōi lán Amōrinō kè nà, kũ Dikiri pēm̄ma Isarailanone.

²⁷ Kũ Ahabu mà le, akũ à a uta gà à kè à uta kasanō dà ari à ìo, akũ à lé yĩ à gò té kũ pōsiraō.

²⁸ Akũ Dikiri yā sù Iliasua:

²⁹ N è deran Ahabu a zĩda nàtemene nà yá? Zaakũ à a zĩda nàtemene, mani yā vāni pì ke a onne a gōrōaro. A négōgbēn mani yā vāni pì ke a onne.

22

Mikaya annabikēyā vāni ona Ahabunē

¹ À kà wè aakō kũ Siriano kũ Isarailano dí zĩ ká kũ kōoro.

² A wè aakōde pì gūnn Yudanō kína Yosafata gèe à Isarailano kína lè.

³ Isarailano kína pì a gbēnōne: Á dō kũ Ramō Giliada bi ó pōme yāroo? Ama ódi a sina Siria kínaa yā kekero.

4 Akū à Yosafata là à pì: Ìni gé kūmao zì ká kū Ramo Giliadadenoro? Akū Yosafata wèa à pì: Pó dokōnōme ó ũ, ma gbēno bi n gbēnōme. Ma sōno bi n sōnōme.

5 Akū à èra à pìne: Ñ Dikiri gbeka ñ ma gĩa.

6 Akū Isarailano kína annabino kàkara lán gbēnon wàa pla bà, akū à n lá à pì: Mà gé zì ká kū Ramo Giliadadenon yá, ke màsun géro? Akū ò wèa ò pì: Ñ gé! Dikiri ni n nanne n oĩ.

7 Akū Yosafata pì: Dikiri annabi ke kú la ò a laroo?

8 Akū Isarailano kína wèa à pì: Gōgbē ke kun do, a tón Mikaya, Imlā néme. Ani fō à yā gbekawere Dikiria, ama má yeiro, zaakū àdi yā mana omene zikiro, séde a vāni. Akū Yosafata pì: Ñsun o lero kína!

9 Akū Isarailano kína a ibanō doke sisi à pìne: Ñ gé ñ Imlā né Mikaya sisi à su likalika.

10 Isarailano kína kū Yudano kína Yosafatao baadi a kible'uta dana, ò vutena n kiblegbaaa pōwegbēki kū à kú Samaria bñileā, akū annabii pìnon ten annabikeyā o n are n pínki.

11 Kenana né Zedekia mōsi pì lán bēne bà à pì: Dikiri pì bēne dínōn ìni Siriano zōzōo ñ n dede n pínki.

12 Akū annabii pìnon ten yā dokōno o n pínki òten pi: Ñ gé léte Ramo Giliadaa, ìni fuaro. Dikiri ni n nanne n oĩ.

13 Gbē kū à gēe Mikaya sisi pìne: N annabi dakeno lé kè dokōnon yee! Yā nnan òten o kìnane. Ñ yā dokōno pì o se ñ yā nna one.

14 Akū Mikaya pì: Ma sì kū Dikiri kunnaao, yā kū Dikiri òmenen mani o kínane.

15 Kū à kà, akū kína a là à pì: Mikaya, ò gé zǐ ká kū Ramo Giliadadenon yá, ke òsun géro? Akū à wèa à pì: Ñ gé létemma! Ìni fuaro. Dikiri ni ñ nánne n oĩ.

16 Akū kína pìne: Gèn ũgban mani n da ñ sí kū Dikirio kú yāpuran ìni omeneε?

17 Akū Mikaya pì: Ma Isarailano è fākōana sīsīno kpadoa lán sã kū ò dāri vīrono bà. Akū Dikiri pìmene, gbē pìnon don'arede vīro. Ñ baadi tá a bea aafia.

18 Akū Isarailano kína pì Yosafatane: Ñdi ma gweroo? Mádi onne kú àdi yā nna omene zikiro, séde a vāni?

19 Akū Mikaya èra à pì: Ñ Dikiri yā ma! Ma Dikiri è vutena a kpatan, ludambe zikarinō zeze a sare ñ pínki oplai kú ozeo.

20 Akū Dikiri pì: Dí mé ani òndō kemene Ahabune à gé léte Ramo Giliadaa de à ga gwee? Akū gbēke pì la, gbēke pì la do.

21 Akū nini ke bò à sù à zè Dikiri are à pì: Makū mé mani gé òndō kene. Akū Dikiri a là à pì: Ìni ke deramεε?

22 Akū à wèa à pì: Mani gé mà ke nini ékede ũ mà yā soso mà ká a annabinone ñ lén. Akū Dikiri pì: Ìni òndō kene, ìni fuaro. Ñ gé ke le.

23 Len Dikiri tò nini ékede pì yā soso à kà n annabi dīnone ñ lén le ñ pínki. Sunyīn Dikiri kpānyī.

24 Akū Kenana né Zedekia gèe à Mikaya sãn kè à pì: Boren Dikiri Nini bòma à gèe à yā ònneε?

25 Akū Mikaya wèa à pì: Ìni dō zī kū n bàa lè n ge

ute kpénen.

²⁶ Akū Isarailanŋ kína pì: À Mikaya kū à tá kãao wēte kína Amŋ kū ma né Yoasio kīnaa,

²⁷ á oñne ma pì ò a da kpésiran, ògŋ burodi kpáa kū ío fitifiti ari mà gé suo aafia.

²⁸ Akū Mikaya pì: Tó n ge n su aafia, séde adi ke Dikiri mé à yā ò ma gāiro. Akū Mikaya era à pì: Asa á baadi pínki ma yā pìi màa?

Ahabu gana zaa Ramŋ Giliada

²⁹ Isarailanŋ kína kū Yudanŋ kína Yosafatao gèe Ramŋ Giliada.

³⁰ Akū Isarailanŋ kína pì Yosafatane: Mani ma zīda lite mà si zīn. Mŋkŋn sŋ, ògŋ kú la kū n kible'utao dana. Akū Isarailanŋ kína a zīda lite à sì zīn.

³¹ Siria kína gīnake sŋ à ò a sŋgo don'arede gbēnŋn baraakuri awεεplanŋne à pì: Àsun are dŋ gbēkea zīnlo, bee díme, séde Isarailanŋ kína ado.

³² Kū sŋgo don'arede pìnŋ Yosafata è, òten da Isarailanŋ kiname. Kū ò sŋ dàa, akū Yosafata wiki lè.

³³ Kū ò è Isarailanŋ kīnanlo, akū ò a tò gwe.

³⁴ Kū gbēke kàa gbàre, akū à gèe à Isarailanŋ kína pà, à gèe a mò'uta pekereki dagura. Akū à pì a sŋgodene: Ñ sŋ lé lite ò bo zīn, ò ma kīnname gwe.

³⁵ Zīi pì gbāna kpà zī birea, akū ò kína pì kūkūna a sŋgo gūn, ò are dŋ Siriana. Gu kū ò a kīnnan pì ten aru bo àten kóte sŋgo gūn. Zī pīia ŋkŋsin à gā.

³⁶ Kū ifántē ten gē kpén, zīkarinŋ wiki kākara ò pì, baadi tá a būsun ari a be wēten.

³⁷ Len kína pìi gā le, akū ò a gèe sè ò sūo Samaria ò a vī.

38 Ò a sōgo pìpi Samaria íkákia, gu kŭ karuanŏ dì zú on, akŭ gbēdanŏ sù ò a aru sàsá lákŭ Dikiri ò nà.

39 Ahabu yā kparanŏn kú Isarailanŏ kínanŏ gīayākēna takadan, yā kŭ à kènŏ pínki kŭ kpé kŭ à bò kŭ wisa sakaaŏ kŭ wētē kŭ à kēkē à kàtēnŏ.

40 Kŭ Ahabu gà, akŭ a né Azia vùte a gēne ũ.

Yudanŏ kína Yosafata

41 Isarailanŏ kína Ahabu kíblena wè siikōde gŭnn Asa né Yosafata kè Yudanŏ kína ũ.

42 A wè baraakuri awēesōrode gŭnn à kè kína ũ, akŭ à kí blè Yurusalemu wè baraasōro. A da tón Azuba, Sili néme.

43 À zè kŭ a de Asa yākenanŏ zé sīnda pínki gŭn, adi pānero, à yā kŭ Dikiri yeii kè. Bee kŭ abireo adi tānagbagbaki kŭ ò bònŏ gbororo. Ò kpé òten sa oa òten turaretiti kpáta gwe.

44 Yosafata kŭ Isarailanŏ kínaŏ kú kŭ kōŏ aafia.

45 A yā kparanŏn kú Yudanŏ kínanŏ gīayākēna takadan, a négōgbēkeyānŏ kŭ zì kŭ à kànŏ pínki.

46 Tānagbagbaki karua kpara kŭ ò gō a bŭsun zaa a de Asa gōranŏ, à pēm̄ma gōgbēnŏ kŭ nōgbēnŏ ní pínki.

47 Edōmu bŭsu kína vī gōrŏ birearo, séde gbē zōkō kŭ Yudanŏ kína dìte.

48 À gó'ite lagatabŏnŏ kè de ò gé wura sé Ofi, ama odi le ò bo kŭ táo ísiralaro, zaakŭ gó pìnŏ wīwi zaa Eziō Gēba.

49 Gōrŏ birean Ahabu né Azia pì Yosafatanē à tó a gbēnŏ da ísira musu kŭ a gbēnŏ lēele, ama Yosafata dí wero.

50 Kŭ Yosafata gà, ò a mira kpàkūsŭ kŭ a dizinŏ a dizi Dauda wēten, akŭ a né Yoramu vùte a gēne ũ.

IsarailanƆ kína Azia

⁵¹ YudanƆ kína Yosafata kíblena wè gẽro awεεplade gūnn Ahabu né Azia kè IsarailanƆ kína ũ Samaria, à kí blè wè pla.

⁵² À yã kũ Dikiri yeiro kè à zè kũ a de kũ a dao yão kũ dɔ Nεbati né Yeroboamu kũ à IsarailanƆ dà durunnakenan yão.

⁵³ À dò Baalii, à a gbàgba, akũ à Dikiri IsarailanƆ Luda pɔ fɛ̀nε lákũ a de kè nà.

Luda yá takada kú Bisá yáo
Portions of the Holy Bible in the Busa language of
Nigeria

copyright © 2005 SIM International

Language: Bisá (Busa)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-10

PDF generated using Haiola and XeLaTeX on 18 Apr 2025 from source files dated 31 Aug 2023

8631d380-7d17-5581-abf9-174814e8ccc3